

任邱 王桐齡著

中國民族史



北京文化學社印行

639  
112  
3



3 0662 4308 4

THE HISTORY  
OF  
THE RACES OF CHINA

中國民族史

任邱 王桐齡著

北京文化學社印行

陳垣同志遺書

A110400



本書作者由本社印行之其他著作

中國史

第一編

一元二角五分

中國歷代黨爭史

八角

日本視察記

八角

江浙旅行記

五角

陝西旅行記

五角



# 序

晚清光宣之交，國人對於民族觀念上發生兩種誤解：一爲對內之誤解，是曰排滿；一爲對外之誤解，是曰媚外。實則中國民族本爲混合體，無純粹之漢族，亦無純粹之滿人，無所用其排。中國文化常能開闢東亞，武力亦能震撼歐洲，亦不必用其媚。

著者往年曾在北京師範大學擔任中國民族史，又在東南大學暑期學校擔任北三民族活動史，皆急就章，組織不甚完密；茲將兩種講義合併爲一，加以訂證增補，交由文化學社出版，定名曰中國民族史。分爲上下二編：上編爲內延史，敘述中國民族對內融合事蹟，下編爲外延史，敘述中國民族對外發展事蹟。

內延史以漢族爲主體，凡滿族中之肅慎，扶餘，高麗，百濟，靺鞨，渤海，女真，滿洲，蒙族中之獯鬻，玁狁，狄，匈奴，蒙古，韃靼，瓦剌，滿蒙混血族中之山戎，烏桓，鮮卑，吐谷渾，柔然，奚，契丹，回族中之丁零，月氏，烏孫



，高車，鐵勒，突厥，回紇，沙陀，藏族中之戎，氐，羌，吐蕃，黨項，苗族中之九黎，三苗，荆蠻，百越，西南夷，南詔與後世民族中無所歸屬之東夷，皆全部或一大部分融合於漢族血統中，爲中國民族組成之主要分子。中國史上之國家：若金與清爲滿族所創，若前趙，後趙，夏，北涼，元爲蒙族所創，若前燕，後燕，西燕，南燕，西秦，南涼，後魏，北周，北齊，遼爲滿蒙混血族所創，若後唐，後晉。後漢爲回族所創，若前秦，後秦，後涼，仇池，西夏爲藏族所創，若成爲苗族所創者無論矣；即號稱漢族創立之國家，齊爲漢族與東夷混合體，秦爲漢族與西戎混合體，楚，吳，越爲漢族與南蠻混合體，晉，燕爲漢族與北狄混合體，南越，閩越，東甌及後來之長和，大理爲漢族與苗族混合體，無不含有異族血統；號稱漢族一統之大國家，若秦與漢爲漢族與東夷，西戎，南蠻，北狄之混合體；隋與唐爲漢族與匈奴，烏桓，鮮卑，氐，羌，巴氏之混合體，由唐至宋爲漢族與高麗，百濟，突厥，鐵勒，沙陀，黨項，吐谷渾，吐蕃，奚，契丹之混合體，明爲漢族與女真，蒙古之混合體，中華民國爲漢，滿，蒙，回，藏，苗六

族混合體，亦絕無單純血統。

外延史以漢族向外發展事蹟爲主體，參以滿，蒙，回族向外發展事蹟，若朝鮮境內之漢領四郡，唐領安東都護府，越南境內之秦領象郡，漢領交趾刺史部，吳領交州，唐領安南都護府，直隸於中國中央政府者無論矣；即朝鮮境內之箕氏，衛氏，後高麗王氏，後朝鮮李氏四王國，越南境內之林邑區氏，范氏兩王國，占城諸葛氏王國，交趾丁氏，黎氏兩王國，大越李氏，安南陳氏，大越黎氏三帝國，安南莫氏都統使司，廣南阮氏王國，暹羅境內之扶南范氏王國，暹羅鄭氏帝國，其創立國家之人何一非漢族。日本，琉球，緬甸諸國及南洋羣島諸部落，其創國之人雖非漢族。主權亦不在漢族手，然其所以開化原因，何一不受漢族影響。他如鄭成功父子開闢臺灣，葉來開闢新嘉坡，美洲華僑建設橫貫大西洋及太平洋間之大鐵路，法國境內華工參加歐洲大戰，何一非漢族成績。至若匈奴西遷以後，建立匈加利王國；突厥西遷以後，建立伽色尼，塞爾柱克兩王國，阿斯曼土耳其帝國；遼室西遷以後，建立西遼帝國；蒙古西征以後，建立欽察，察合台，窩

序

四

關臺，伊兒汗四大汗國及帖木兒，莫臥兒兩帝國；何一非滿蒙回族武功。歐洲中古近古時代屢受亞洲影響，而其原動力皆在中國；我國民族亦可以自豪矣。同胞果不自菲薄乎？盍人手一編，以供借鏡之資可也；是爲序。

中華民國十七年七月二十六日王桐齡自序於燕京大學教員寄宿舍



## 凡例

一、本編所引用之史料，多係人所共知，本來無加註釋之必要；以原文太簡單，讀者或不明瞭其事蹟之始末，故特註明出處，以便檢查原文。

二、本編所用史料，往往取材於自著之書；非欲自炫，實以工欲善其事者必先利其器，工具非常用者，使之不順手也。

三、本編注重民族之混合及發展事蹟，對於國家之盛衰興亡與社會文化之進步退步，有時連帶叙及之，無暇詳述；讀者有願研究當時各民族之政治狀況與社會狀況者，可參考文化學社出版之拙著中國史與商務印書館出版之拙著東洋史，本編恕不多叙。

四、內延史第一章第二章第三章，曾登載燕京大學社會學會出版之社會學界雜誌第一卷及北平日本留學生所組織之北京同學會語學校出版之同學會會報第一號第三號，第四章曾登載社會學界第二卷，原係語體，非文體；以反串文字比較不大通俗，故仍改成粗淺文體，以便中外士大夫溜覽。

凡例

二

五、序論及內延史第一章第二章第三章，前經北京導報節譯成英文，讀者有願參考者，可檢查民國十六年七八月間導報。

中華民國十七年七月二十六日王桐齡自誌於燕京大學教員寄宿舍



# 中國民族史目錄

## 序論

一—四

## 本論

## 上編 內廷史

第一章 漢族胚胎時代 太古至唐虞三代

一—九

第一節 中國民族之成分

一

第二節 漢族苗族之接觸

三

第三節 漢族內部之融合

五

第二章 漢族蛻化時代 東夷西戎南蠻北狄血統之加入 春秋戰國

一一—二四



目錄

小引

第一節 東方民族 夷

第二節 南方民族 蠻

第三節 西方民族 戎

第四節 北方民族 狄

歸結

第三章 漢族休養時代 漢族與匈奴之接觸 漢族與烏孫之聯合 秦漢

二五—三〇

第四章 漢族第二次蛻化時代 三國兩晉南北朝

三一—六八

小引

三一

第一節 匈奴血族之加入

三二

一，前趙劉氏及後趙石氏 二，夏赫連氏 三，北涼沮渠氏

第二節 烏桓血統之加入

三八

第三節 鮮卑血統之加入

四一

一，檀石槐 二，燕慕容氏 三，後魏拓跋氏 四，西秦乞伏氏及南涼  
禿髮氏 五，北齊高氏及北周宇文氏

第四節 氐羌血統之加入

五〇

一，氐羌之起原 二，仇池楊氏 三，前秦苻氏 四，後涼呂氏 五，

後秦姚氏

第五節 巴氏之復活及其同化

六〇

歸結

六三

第五章 漢族第二次休養時代 隋唐

六九—九五

小引

六九

第一節 高麗百濟血統之加入

七一

第二節 突厥血統之加入

七五

第三節 鐵勒血統之加入

七八



目錄

第四節 沙陀血統之加入

八〇

第五節 党項血統之加入

八二

第六節 吐蕃血統之加入

八四

第七節 奚血統之加入

八七

第八節 契丹血統之加入

九〇

第六章 漢族第三次蛻化時代 五代及宋元

九七—一〇九

小引

九七

第一節 契丹之漢化

九八

第二節 女真之漢化

一〇二

第三節 蒙古之漢化

一〇五

第四節 西域諸國人之漢化

一〇七

第七章 漢族第三次休養時代 明

一一一—一二八

小引

一二一

第一節 雲南之漢化

一一一

第二節 貴州之漢化

一二六

第八章 漢族第四次蛻化時代 清

一二九—一二九

第一節 滿州之漢化

一二九

第二節 內蒙古之漢化

一二一

第三節 新疆之漢化

一二四

## 結論

一三一—一四一

## 目錄

卷一

# 中國民族史

## 序論

任邱王桐齡著

生物各有其環境，適合於環境則生，否則死；陸地之生物，移之水中則溺死；水中之生物，移之陸地則槁死；熱帶之生物，移之寒帶則凍死；寒帶之生物，移之陸地則焦死；北極熊，猛獸也，足跡不到非洲。暹羅之象，波斯之獅，獐物也，足跡不到西伯利亞。鯨鯨，巨物也，陷於淖中，則爲螻蟻所困。虎豹，兇暴物也，遊行海邊，常爲鱷魚所食。物無大小，其受環境之支配則一也。吾人亦然：Eskimo——愛斯基摩人，大半居於美洲之北冰洋沿岸，身材短小，面色黃，目直而頰突出。——民族，不能繁殖於非洲大陸；Ethiopia——居於非洲蘇丹地方之黑色人種——民族，不能繁殖於北冰洋沿岸；純粹歐洲白色人種血統，生活在南洋羣島者，不能繼續至三代以上；人無靈蠢，其受環境之限制亦一也。

凡生物皆能順應其環境：沙漠中之動物色多黃，雪地中之動物色多白，森林

中之動物色多褐，海面上之動物多無色透明體，花間之蛺蝶，形與色全似花；草間之昆蟲，形與色頗似草；鳥類生活於空中，故有能飛之羽；獸類生活於陸地，故有善走之足；魚類生活於水中，故有能泳之鰭；凡此者皆非自始已然，乃經過無限年代，幾多變化，幾多淘汰，始得此適合於環境之組織也。吾人亦然：吾人冬衣裘，夏衣葛，春秋衣褐，以與時間相推移；水行乘舟，陸行乘車，泥行乘楫，山行乘櫟，飛行乘機，潛行乘艇，以與空間相接觸；凡此者亦非自始已然，乃經過無限年代，幾多磨鍊，幾多研究，始得此適合於環境之組織也。

環境時常變化：有逐漸變化者，生物常逐漸變更其內部之組織以順應之；有驟然變化者，生物內部之組織，不能不與之同時俱變，而又不能忍受此劇變，則蛻化尙焉；能蛻化者則生，否則死。前世界之大動物，其滅種者何限；現世界之生物，其滅種者何限；曰惟不善蛻化之故。蠶，小動物也，初生時爲卵，一變爲成蟲，再變爲蛹，三變爲蛾；蝶，亦小動物也，初生時爲卵，一變爲蟲，再變爲蛹，三變爲蝶；乃能遺傳其種族以至今日，曰惟善蛻化之故。吾人亦然：塔斯馬

亞尼島之黑人，在四十年前——一八七六年——已滅種；美洲之印第安人，澳洲及新西蘭之土人，近來人口亦銳減；曰惟不善蛻化之故。北美洲，荒地也，盎格魯撒遜人——Anglo-saxon——能吸收歐洲各國民族，造成富強甲於全球之合衆國；曰惟善蛻化之故。我中國建國之久，已歷四千餘年；與我國同時建國之埃及何在？美索波達米亞何在？墨西哥何在？秘魯何在？而我則國猶如是，民猶如是，戶口之多，有加於昔；雖內部經過許多變亂，外部受過許多騷擾，而我常能順應環境，利用吾族文化，抵抗外族武力，每經一次戰爭，常能吸收外來血統，銷納之於吾族團體之中，使之融合無間；中間受過幾多壓迫，忍過幾多苦楚，而卒能潛滋暗長，造成龐大無倫之中國者；曰惟善蛻化之故。漢族性情喜平和，儒教主義尙中庸，不走極端，不求急進，此爲善於蛻化之一大原因。而全國四億人中，漢族竟占百分之九十五以上；其中經蛻化而來者固不少矣。茲列舉其蛻化之事蹟及時代於左，以供研究中國民族史者之參攷：

一、漢族胚胎時代、漢族苗族之接觸、漢族內部之融合、太古至唐虞

三代。

二、漢族蛻化時代、東夷，西戎，南蠻，北狄血統之加入、春秋戰國。

三、漢族休養時代、秦，漢、

四、漢族第二次蛻化時代、匈奴，烏桓，鮮卑，氐，羌血統之加入、三國，兩晉，南北朝。

五、漢族第二次休養時代、高麗，百濟，突厥，鐵勒，回紇，沙陀，黨項，吐蕃，奚，契丹血統之加入、隋唐。

六、漢族第三次蛻化時代、契丹，女真，蒙古及西域諸國血統之加入、五代，及宋，元。

七、漢族第三次休養時代、明。

八、漢族第四次蛻化時代、滿洲，西藏血統之加入、清。

中華民國十三年六月二十日王桐齡自序

## 本論

### 上編 內延史

#### 第一章 漢族胚胎時代 太古至唐虞三代

##### 第一節 中國民族之成分

現在中國人動言五族平等；所謂五族者，即漢，滿，蒙，回，藏族，譬如作一家人看：漢族是長兄，滿族，蒙族，回族，藏族便是幼弟；是爲現在人的觀察；若照歷史上觀察，中國民族除去漢滿蒙回藏五族以外，還有一位長兄，即是苗族。

中國民族起原地，大概在蔥嶺一帶，即亞洲中部的山脊，西洋書上稱爲帕米爾高原。相傳前世紀末年，地球表面起過一次大變化，大陸多震裂，沉爲洋海，地面上的生物——有生命的叫作動物，有生氣無生命的，叫作植物，——一時同歸於殄滅；最後人類，乃奔避於地面最高處，即是帕米爾高原。遲之幾千萬年，



地球表面之水，漸收斂成五大洋，新陸地逐漸浮出，遂成現世界的形勢。(註一)現世界人類之祖宗，從帕米爾高原，分道下山，遷到平原；往西遷的，大半移到中亞細亞，阿富汗，俾路芝，波斯，美索波達米亞，小亞細亞，阿剌比亞及歐洲等地，後來成爲白色人種；往東遷的，移到新疆，青海，西藏，蒙古，滿洲，朝鮮及中國內地，後來成爲黃色人種。(註二)

黃色人種下了帕米爾高原以後，便分道往東南東北兩方面進行；往東南方面進行的有三族，歷史家稱之爲南三系，往東北方面進行的亦有三族，歷史家稱之爲北三系。南三系中第一族，遷到中國中部，南部——即揚子江流域七省，西江流域五省，——同印度支那半島——即越南，暹羅等——等地，歷史家稱之爲交趾支那民族；現在四川南部之獠，貴州之苗，廣西，湖南之獠，雲南之獠，廣東之蠻，同暹羅，越南境內之土人，皆屬於此族。因中國唐虞時代，此族曾創立過大國與漢族對抗；國名三苗，所以後人就稱之爲苗族。第二族遷到中國北部，就是黃河流域六省，因爲此族在中國中古時代，曾創立過一統之大帝國，國名爲漢，

後人就稱此族爲漢族。 第三族遷到青海，西藏，歷史家稱之爲圖伯特族；——*Tibet*——因爲此族大多數住在西藏，所以現在就稱之爲藏族。 北三系中第一系遷到中國東北地方，歷史家稱之爲通古斯族；——*Tunguse*——因爲此族大多數住在滿洲，所以現在就稱之爲滿族。 第二系搬到中國正北地方，在中國近古時代，曾創立過蒙古大帝國，所以後人就稱之爲蒙族。——*Mongol*—— 第三系遷到中國西北地方，即阿爾泰山系以東以西等地；歷史家稱之爲突厥族；——*Turk*——因爲此族大多數奉回教，所以現在就稱之爲回族。

## 第二節 漢族苗族之接觸

就領土之廣，戶口之衆，傳世之久，文化程度之高言之，當然承認漢族爲嫡長子，爲元子；若但就移入中國內地之先後次序言之，畢竟是苗族先入中國？還是漢族先入中國？却甚有研究的餘地？ 就中國史上觀察：當四千年前，漢族占領黃河流域，以務農爲業，逐漸向四方發展之時，揚子江中流，現在湖北，湖南，江西等地，已經有苗族占領；此族之國名爲九黎，君主名蚩尤，蚩尤非常驍雄

，當時同漢族共主炎帝榆罔氏大起衝突，擊敗榆罔兵，追逐至現在直隸口北道涿鹿縣，黃河流域幾乎全陷；幸而漢族中有一大英雄，是當時大諸侯有熊國君主，姓公孫，名軒轅，迎擊蚩尤，敗其兵，殺之，於是衆推公孫軒轅爲共主，史書上稱之爲黃帝。(註三)

黃帝非常英雄，即位以後，經略四方，天下有不服者，以武力制服之，於是漢族勢力逐漸擴大。傳數世至唐堯，虞舜二帝時代，苗族復作亂，當時苗族之大國名三苗，憑藉現在湖北，湖南，江西爲根據地，屢與漢族宣戰；相持若干年，至虞舜晚年大禹攝政之時，借着治洪水之餘威，始招降苗人；於是有史以前漢苗二族競爭，至此始告一結束。

當時苗族文化相當發達，第一發明刑法，第二發明兵器，第三發明宗教，後來漢族所用之五刑，兵器及甲冑，所信奉之鬼神教，大概皆苗族所創，而漢族因襲者。(註四)後來苗族子孫，有一大部分完全同化於漢族；其不肯同化之一小部分，逐漸遷到中國西南各省——雲，貴，廣西，湖南等地——深山中，與木石居，與鹿

豕遊，不肯與漢族雜居，不肯與漢族結婚，於是文化程度遂落於漢族之後，到現在反成爲不開化之民族矣。

### 第三節 漢族內部之融合

黃帝以前之漢族，似是最先移入中國之一支，此一支漢族何時來到中國？現今無從推定；不過據史書上所載之事蹟觀察：五帝中第一帝伏羲氏建都於陳，即現在河南開封道淮陽縣；第二帝神農氏建都於曲阜，即現在山東濟寧道曲阜縣；至少伏羲氏以前，漢族早已移到黃河下流，淮水北岸，休養生息若干年，經過漁獵時代，——以捕魚爲業——入於狩獵時代，——以獵野獸爲業——再入於牧畜時代，——以養家畜爲業——最後進入農業時代。——以植五穀爲業——當時漢族文化程度，較現在外蒙古境內之蒙族，西藏境內之藏族，似乎少高。此一支漢族最古之皇帝：有所謂盤古氏，天皇氏，地皇氏，人皇氏；此諸位皇帝，是否真有其人？現在不敢臆斷。（註五）但是後來幾位皇帝，譬如有巢氏教民構木爲巢，以避爪牙角毒之害，故稱有巢；燧人氏教民鑽木取火，使知烹飪，故稱燧人；伏羲氏結網罟，教民佃

漁，故稱伏羲；又教民養犧牲以充庖厨，故又稱庖犧；神農氏教民植五穀以資民生，又嘗百草以療民疾，故稱神農；此諸位皇帝之尊稱，與漢民族進化有直接關係，當然是實有其人矣（註六）。此一支最後之共主爲炎帝榆罔氏，被苗族九黎國君主蚩尤擊敗，逼到現在直隸口北道涿鹿縣；於是黃帝起兵攻殺蚩尤，即皇帝位。據著者個人觀察：黃帝一支，是從現在口北道西北方面移來者，當然是另外一支；比着第一支，似乎是晚來若干年。黃帝一生：在文化方面，有許多設施；但是終身未嘗建立都會，就側面觀察，可見尙是依着遊牧習慣，同伏羲神農前之一支漢族，情形稍有不同矣。（註七）黃帝崩後，嗣位之皇帝金天氏都曲阜，——今山東曲阜縣——高陽氏都帝邱，——今直隸大名道濮陽縣——高辛氏都亳，——今河南河洛道偃師縣——唐堯都平陽，——今山西河東道平陽縣——虞舜都蒲坂，——今山西河東道永濟縣——夏禹都安邑，——今山西河東道夏縣——從此以後：傳了十七王，四百三十九年，爲商湯所滅；商湯都城在亳，——今河南開封道商邱縣——傳了二十八王，六百四十四年，爲周武王所滅。夏商二代雖時常遷都，然總不離河南中部——今開封道

河洛道——北部——今河北道——直隸山西南部——今大名道河東道——一帶，可見黃河中流兩岸，是當時政治文化之中心點無疑也。

周室勃興，憑藉陝西渭水流域爲根據地，東向以滅商，是爲西方遷來之民族，當然可認爲是第三支。此一支在陝西——原名鎬，亦稱宗周，故址在今咸陽縣境內渭水南岸。——建都，傳了十二王，三百五十一年，爲西藏族之犬戎所滅，嗣位之君主周平王，棄了陝西，遷到洛邑；——今河南河洛道洛陽縣——將陝西舊地封了當時西方之小諸侯秦襄公。（註八）襄公同其子文公，與犬戎血戰二十年，擊退戎兵，建立秦國；從此以後：歷代嗣君多英主，逐漸在陝甘方面擴張勢力，兼併戎人部落甚多；又東下同中原諸侯爭霸，屢次獲勝，在當時羣雄中推爲第一。傳到第三十一代之嗣君政，遂統一中國，建立中國第一次中央集權之大帝國，自稱始皇帝。此一支名義上雖稱爲周室世臣，但是馬夫出身，從前在周穆王時代，其遠祖非子，曾爲穆王養馬於汧渭之間，——在今陝西關中道寶雞縣甘肅渭川道清水縣一帶——封於秦。今甘肅渭川道天水縣——周室根據地在陝西，秦室發祥地在甘肅，

一發偏西，與西藏族雜居，當然可以承認爲第四支無疑矣。

以上各支漢族移到中國境內，當然是比較早來之一支文化發達，晚來之一支武力強盛；早來之一支與晚來之一支彼此結婚，於是血統逐漸混合，文化武力逐漸調和，漢族勢力一膨脹。自黃帝至秦始皇帝，前後約畧有二千餘年，混合過三次，膨脹過三次，遂成爲亞洲人口最多之民族。此有秦大帝國，在當時世界史上，當然是第一等國家；與歐洲之羅馬帝國，東西對峙，代表兩方之文化。

註一、看自著中國史第一編第二十六至二十八頁洪水說。民國十六年一月文化學社再版。

註二、看自著中國史第一編第一百六十二頁中國文化之發源地，自著東洋史第二編第三十，三十一頁印度文化之發源地。民國十一年六月商務印書館出版。

註三、看自著中國史第一編第一百七十四頁黃帝之外征，自著東洋史第一編第三頁漢族與苗族之衝突。

註四、看自著東洋史第一編第八，第九頁五族同化論。

註五、看自著中國史第一編第一六八至一七一頁太古之神話。

註六、看自著中國史第一編第一百九十五，一百九十六頁三皇五帝說。

註七、史記五帝本紀：「天下有不順者，黃帝從而征之，平者去之，披山通道，未嘗寧居。東至於海，

登丸山及岱宗；西至於空桐，登雞頭；南至於江，登熊湘；北逐葷粥，合符釜山，而邑於涿鹿之阿。

• 遷徙往來無常處，以師兵爲營衛」云云。

註八、看自著中國史第一編第二百四十二頁，西周之衰亡，第二百六十五頁東周之式微，自著東洋史第一編第十三頁戎狄之猖獗。



第二章  
註

## 第二章 漢族蛻化時代

東夷西戎南蠻北狄血統之加入 春秋

### 戰國

#### 小引

第一支漢族滋生之區域，僅在黃河下流，——山東河南之交——第二支擴張到黃河中流，——河南山西直隸之交——第三四支更擴張到黃河上流，——陝西甘肅——愈擴張愈西，於是現在甘肅東部，陝西中部，河南中部北部，山西南部，直隸西南部，山東西部全成爲文化區域。但是除去這幾省的幾部分以外，還有許多民族，占領中國境內若干地方，尙未與漢族同化，茲列舉其名目如左：

#### 第一節 東方民族 夷

據史書上所載之事蹟觀察：當時東方有一支民族，佔領現在江蘇，安徽北部之淮水流域同山東半島，史書上稱之爲東夷。此一支文化程度頗高，大約與漢族相亞；不過自義黃以前，已經分立許多部落，與漢族對峙。周滅商時，此一支非常表同情於商室，舉義兵，助着商之後人抗周；周武王封岳父呂尙——卽太公望——

於齊，——今山東膠東道益都縣——經畧山東半島；封胞弟周公旦於魯，——今山東曲阜縣——經畧淮水流域；武王尋崩，武王之子成王年幼，周公留在宗周攝政，命長子伯禽代就國，經畧淮水流域，雙方相持若干年，始將此次風潮消弭。（註一）傳到穆王宣王時代，又起過幾次衝突；東夷之強國在淮水中流——江蘇西北部舊徐州淮安二府——者名徐戎，在淮水下流——江蘇東北部舊揚州府海州直隸州一帶——者名淮夷，在山東半島——今膠東道——者名萊夷，此外小部落尚多，時常與漢族諸小國起衝突；（註二）經過春秋戰國數百年，齊國勢力包拓山東半島，楚國勢力亦擴張至淮南淮北，東夷始完全同化於漢族。但是慍悍勇鷙之風氣猶存，每到歷代鼎革之時，此地的人民，必首先發難，與中央政府爲難；後來秦末之劉邦，項羽，西漢末之赤眉，東漢末之曹操，唐末之黃巢，朱溫，元末之劉福通，李二，朱元璋，清末之捻匪，皆此地出身人物；民國第一任大總統袁世凱以及北洋系中諸軍人，亦多係此地出身人物。

## 第二節 南方民族 蠻

第二一支在中國東南方，占領現在江蘇，安徽南部之揚子江南岸與浙江北部錢塘江流域，史書上稱之爲吳越。（註三）此一支民族風氣斷髮文身，與漢族之義冠博帶者成反比例，其語言亦與漢族系統全然不同，當然血緣較遠。此一支開化之歷史，據史書上所載之事蹟觀察：當有商末年，周武王之大伯祖泰伯，二伯祖仲雍，率領一部分漢族，由陝西東南下，經由湖北，遷到江蘇，憑藉現在蘇常道吳縣爲根據地，實行殖民政策，國號吳。同時另外有一部落，自稱爲夏后氏少康苗裔，憑藉現在浙江會稽道紹興縣爲根據地，逐漸向北發展勢力，國號越。此二國在江浙一帶，休養生息數百年，併吞江南各小部落，逐漸變成大國；至春秋末年，始交通上國，——指黃河流域諸國——與晉楚爭霸於中原。後來吳滅於越，越又併於楚，楚又滅於秦，此一支民族分布地始完全同化於漢族。

第三一支爲荆舒，占領中國南方，荆人之分布地在湖北，舒人之分布地在安徽中部，——淮南江北——其地爲苗族舊領土，當然此一支與苗族有血緣上之關係。（註四）荆人在商時已極猖獗，舒人在周初亦甚跋扈，春秋時代，荆人一支有一強

國名曰楚，憑藉現在湖北省荆南道秭歸縣爲根據地，逐漸向東發展勢力；佔領湖北一大部分，併吞周初分封在漢水流域之漢族諸小國；復突過秦嶺山脈北上，與齊晉諸國爭霸於中原。自稱彼之先人鬻熊曾爲周文王師，凡百舉措，極力摹倣漢族，於是湖北民族始完全同化於漢族。後來楚國兼併舒人領土，於是安徽江北一帶之民族，亦完全同化於漢族。

第四一支爲羣蠻，佔領中國南方，現在湖南，廣西，貴州，雲南等省皆爲其分布地；蠻字形從蟲，可以推測其文化程度之低；其音爲苗字之音轉，當然係承襲苗族血統。（註五）春秋時，羈縻於楚，然亦時常爲楚患；戰國時，楚吳起南併蠻越，遂有洞庭，蒼梧之地，於是漢族文化擴張到湖南東南部及廣西北部。秦昭王將伐楚，先畧取蠻夷，置黔中郡，於是湖南西部，貴州東北部入於中國。漢武帝時，通西南夷，置牂牁，益州二郡，於是貴州西部，雲南東北部亦入於中國。東漢明帝時，哀牢夷來歸，置永昌郡，於是雲南西部亦入於中國。但是此一族始終不願與漢族同化，土地雖爲漢族所有，其民族多引入深山中，不與漢族往來，

直至民國成立以後，制定憲法之時，議員諸公，遂將此族除外，稱爲五族共和矣。

第五一支爲閩，其分布地爲現在福建，其形從蟲，可以想見其文化程度甚低；其聲從門，爲苗蠻二字之音轉，可以推定其與苗族血緣甚近；其語言系統，至今日猶與各省官話截然不同，當然與漢族血緣甚遠。（註六）此一支在春秋末年羈縻於越，戰國時羈縻於楚，秦始皇統一中國，羈縻於秦，秦在此地置閩中郡。秦亡以後，此地舊酋長無諸，自稱爲戰國時代越王句踐苗裔，復據住舊地，漢高帝因封之爲閩越王。漢武帝滅閩越，徙其衆於江淮間，於是閩族遂移居江北，與漢族雜居。南北朝時代，漢族南遷，在福建境內，設立建安——今建安道——晉安——在建安南——二郡，於是留居福建閩族之遺民，亦逐漸同化於漢族。

第六一支爲甌越，占領浙江南部之甌江流域，其民族與越血統較近。（註七）其地舊屬越，越亡後入於楚，楚亡後入於秦，秦亡，此地舊酋長搖，自稱爲越王句踐之後，漢高帝因封之爲東海王。武帝時，閩越擊甌越，甌越請舉國徙入內地，

乃悉處其衆於江淮之間。晉室南遷以後，逐漸在甌越故地移殖漢族，於是甌越民族亦同化於漢族。

第七一支爲南越，占領現在廣東，廣西等地，屬於苗族血統。（註八）戰國時羈縻於楚，楚亡入於秦，秦始皇發兵開五嶺，置南海——今廣東——桂林——今廣西——象郡——今法領越南北部——三郡，徙謫戍民五十萬人以經畧之，是爲漢族大規模的殖民事業。秦亡，此地入於當時之龍川令——今潮循道龍川縣知事——攝南海尉——代理廣東督軍——真定——今直隸保定道正定縣——人趙佗，漢高帝因封之爲南越王。武帝滅南越，在此地分設九郡，徙其一部分土人於江淮間，而逐漸移漢族雜居其地，於是南越亦逐漸同化於漢族。

### 第三節 西方民族 戎

第八一支爲蜀，占領中國西南部，即現在四川西部，此族文化程度較高，與漢族血緣較近。（註九）當太古時代，漢族祖宗沿黃河上流移到甘肅之時，另外一支弟兄，亦沿揚子江上流，移到四川西部，逐漸發展勢力。地當溫帶，雨量豐足，

宜於農業；四圍有山脈，中間有大平原，岷江，涪江，大渡河，流貫於其間，外族侵入不易，適宜於初民繁殖。此族在黃帝時，曾與漢族皇室通婚，後來漢族皇帝無復遠畧，遂與之隔絕不通；周滅商時，蜀人加入周側；戰國時代，秦惠王遣司馬錯將兵攻滅蜀，其地始合并於中國；後經兩漢三國，遂完全同化於漢族。

第九一支爲巴，其分布地在四川東部，巴江，嘉陵江沿岸，世與蜀爲仇；戰國時羈縻於楚，後滅於秦。漢初，尙有一大部分不與漢族同化，其著名者爲廩君蠻；光武帝時，曾與漢族起衝突，光武帝遣劉尙擊敗之，徙其種人七千於江夏，——今湖北武昌漢陽一帶——其後名爲沔中蠻。和帝時，巫蠻復反，朝廷亦徙其人於江夏，從此以後，遂逐漸同化於漢族。（註十）

第十一支爲庸，其分布地在湖北西北部漢水流域，北邊以秦嶺山脈與漢族分界，南邊以巴山山脈與巴人分界，其民族界乎巴與漢族之間。在有周初年，曾助着周人滅商，爲西方諸國首領。春秋時，與楚爲敵國，後爲楚人，秦人，巴人所分，其後遂同化於楚國，爲漢族一部分。（註十二）



第十一支爲西戎，屬西藏族，其根據地在現在青海，西藏，往東分布到甘肅，川邊及陝西，四川二省西境。（註十三）在夏商時代，已同中國交通，周滅商時，加入周師，與東夷立在正反對的地位；就側面觀察：可以知道漢族第二支——商——的血統，與東方民族接近，漢族第三支——周——的血統，與西方民族接近也。（註十三）此族雜居陝甘，與周室根據地太接近，在西周中葉以後，常與漢族起衝突；周穆王，夷王兩代，屢次發兵攻之，不克；至西周晚年，西戎中之大部落名犬戎者，遂攻破宗周，弑幽王，逼漢族共主之周平王東遷洛陽。幸而秦襄公，文公父子，以堅忍態度，率領西方漢族遺民，與之相持二十年，始將戎人擊退；但是從此以後，西戎中陸渾之戎，遂遷到洛陽城南，同漢族雜居。後來經過春秋戰國數百年，秦室屢次用武力與之角逐，始將陝甘一帶之戎，逐漸化爲漢族；但是西戎之根據地——青海，西藏——離中國太遠，交通太不便，後來經過漢，唐，宋，明諸朝，中國歷代政府，雖屢次想與之接近，但是始終不能使之完全同化。直到如今，名義上雖同漢族一家，號稱五族共和，可是語言文字尙且不能相通，豈不是大

笑話。無惑乎他們的大頭目達賴喇嘛，安心要同我們分家，與外國人搭夥去也。

#### 第四節 北方民族 狄

第十二支爲北狄，此一支分兩族，在滿洲方面者爲通古斯族，在蒙古方面者爲蒙古族。（註十四）此二族之根據地太偏北，氣候寒冷，農產物缺乏，從有史以前，爲天然之現象所驅，常有南下之勢。經過許多年代，移到現在萬里長城北邊，血統逐漸混合，變成一種新民族；代表此新民族之最大部落名獯鬻，自黃帝以後，屢與漢族起衝突；商朝末年，周室先君古公亶父，很受其壓迫；當時獯鬻勢力範圍很廣大，現在直隸，山西，陝西北境，皆有其踪跡。周室滅商，統一黃河流域，武王封弟召公奭於燕，——今京兆薊縣——成王封弟叔虞於晉，——始封之國名唐，後改名晉，在現在山西河東道翼城縣。——以經畧北方；懿王，厲王，宣王在位時代，此族之大部分名獯鬻——獯鬻之音轉——者時常內犯；至幽王被犬戎所害，平王棄長安，遷洛陽，漢族中央政府自保不暇，於是與獯鬻同族之狄人，遂乘機分股南下，在直隸，山西方面活動。當時直隸境內之燕，邢，——今直隸大名道邢臺

縣——山西境內之晉，山東境內之齊，魯，河南境內之衛，——今河北道淇縣——溫，——今河北道溫縣——鄭，——今開封道鄭縣——宋——今開封道商邱縣——等漢族諸侯國，無一不受其侵畧；甚至兩次攻破洛陽，逐周襄王，幾乎將漢族共主打倒。幸而當時漢族中有一大英雄，名管仲，相齊桓公，實行富國強兵策，先整理齊國內政；然後用尊王攘夷名義，號召山東，淮北，河南，河北諸侯，組織攻守同盟以抗狄。當時狄人東北邊部落名山戎者，正大舉兵攻燕，齊桓公乃自將救燕，攻滅山戎，以其地與燕，於是燕之領土驟大，在直隸境內，能以獨樹一幟，與狄人對抗。山西方面之晉，從獻公以後，經過文公，襄公，成公，景公，悼公，累代皆英主，屢次出兵蠶食狄人領土，將山西，直隸境內之狄人部落，幾乎全數吞併。至戰國末年，萬里長城以南之狄人全數同化於漢族。

### 歸結

以上所舉十二支內，東夷一支與漢族血統接近，吳越，荊舒二支血統，界乎漢苗二族之間，蜀族血統界乎漢藏二族之間，庸族血統界乎漢苗藏三族之間，故

同化較易。羣蠻爲苗族直係血統，閩與甌越，南越三支爲苗族旁係血統，巴族血統界乎苗藏二族二間，西戎爲藏族，北狄爲滿蒙二族之混血族，故同化較難。又諸族起源地，除去北狄，西戎以外，皆在河流近旁；東夷在淮水流域，吳越在揚子江下流及錢塘江流域，荆舒在揚子江中流流域，羣蠻在沅江，湘江，資江，黔江，鴉礮江，金沙江，瀾滄江，潞江流域，閩在閩江流域，甌越在甌江流域，南越在西江流域，蜀在泯江涪江流域，庸在漢水中流流域，巴在巴江，嘉陵江流域，地勢偏南，氣候較爲溫暖，雨量較爲豐盈，交通較爲便利，故容易進化成爲農業國家，從秦漢以後，此一方之人民，遂同漢族混合，不再分立矣。

根據以上血統混合交通頻繁之結果，漢族遂產出五大國，茲試列表於左，以供參考：

國名	民族	根據地	勢力範圍地
齊	漢族與東夷混合	山東	淮北及直隸東南部

楚	漢族與南蠻混合	湖北	湖南，江西，江蘇，安徽，浙江全部，陝西，河南南部，四川東部，廣西北部。
秦	漢族與西戎混合	陝西	甘肅，四川。
晉	漢族與北狄混合	山西	直隸西部，河南，陝西北部，察哈爾綏遠南部。
燕	同右	京兆	直隸東部，奉天西部，熱河南部。

至戰國末年，秦室兼併列國，各族互相接觸，大通婚姻，於是漢族血統發生極大變化，膂力驟強。

又根據以上血統混合交通頻繁之結果，漢族各處文化亦同時發達，茲試列表於左，以供參考：

區域	學派	代表者
鄒魯文化	儒學家	孔子，孟子。
齊文化	法學家	管子。
秦晉文化	法學家 經濟學家	申不害，商鞅，韓非子。 李悝，商鞅。
宋鄭文化	墨學家 名學家	墨翟，宋輕。 鄧析子，惠施。

楚文化	道學家 社會學家	老子，莊子。 許行。
文學家	屈原，宋玉。	

至戰國末年，漢族文化發達總算達於極點矣。

註一、看自著中國史第一編第二百三十八頁對於勝國之政策。

註二、看自著東洋史第一編第十八頁東方民族之叛服。

註三、看自著東洋史第一編第二十二頁吳越族。

註四、看梁任公，飲冰室文集第六十六冊第三十八，三十九頁荆吳組。民國十五年中華書局出版。

註五、看自著中國史第二編第四十五，四十六頁漢與西南夷之關係，自著東洋史第三編第十六頁南詔之

文化。

註六、看自著中國史第二編第四十二頁漢與閩越及東甌之關係。

註七、看中國史第二編第四十三頁漢與閩越及東甌之關係。

註八、看中國史第二編第三十九至四十一頁漢與南越之關係。

註九、看東洋史第一編第十頁。

註十、看飲冰室全集第三十一冊第六頁巴氏族。民國五年中華書局出版。

## 第二章 註

註十一、看飲氷室文集第六十六冊第四十二頁巴庸系。

註十二、看東洋史第一編第十二頁西方民族之出現。

註十三、看東洋史第一編第十三頁戎狄之猖獗。

註十四、看東洋史第一編第十一頁北方民族之出現，第十三頁戎狄之猖獗，第十五頁霸者之尊攘政策。

### 第三章 漢族休養時代 漢族與匈奴之接觸 漢族與烏孫之聯合

#### 秦漢

從周平王東遷以後，至秦始皇統一以前，——西歷紀元前七七〇年至二二二年——凡五百四十八年間，假定名之曰春秋戰國時代。此時代中，東夷，西戎，南蠻，北狄由四圍侵入，漢民族竭全族優秀分子之聰明才力，以吸收之，融合之；其結果，則許多異民族骨血，變成漢民族分子，漢民族勢力一膨脹，遂產出有秦大帝國。（註一）其創業英主秦始皇，始廢封建，設郡縣，實行中央集權制度，此國家進化上必經之階級，歐洲各國在文藝復興時代，日本在明治維新時代皆曾實行；我中國在二千幾百年前已經實行，就歷史上之政體言之，我輩亦差可以自豪矣。

秦始皇一方面整理內政，一方面用武力制服異族，當時秦室對外政策：對南方民族，大體係進取的；對北方民族，大體係保守的。秦滅楚以後，分兵定江南，降百越，置會稽郡，於是錢塘江，甌江流域皆入於中國；廢閩越王，置閩中郡，於是閩江流域入於中國；復略取南越地，置南海，桂林，象郡，於是西江流域



入於中國；是爲甌越，閩越，南越民族與漢族混合之始。又以蒙恬爲大將，將兵三十萬人北伐，擊退戰國以來久爲邊患之匈奴，收現在綏遠區內黃河套一帶地方爲中國有；築長城，西起臨洮，——今甘肅蘭山道岷縣——東至遼東，——今奉天遼瀋道遼陽縣——延袤萬餘里，號稱萬里長城。當時中國行徵兵制度，萬里長城即用民兵築成，史書上言長城一役，暴師於外十餘年，後人因此非難秦始皇者不少，言其勞民傷財；但是從此以後，中國的北邊總算有了保障；匈奴南侵之時總算有了障礙物矣。可惜秦始皇對內對外政策，全用高壓手段執行，引起人民惡感，（註二）始皇崩後，列國的遺民羣起而叛秦；當時楚國遺民中有二大英雄，其一姓劉，名邦，是現在江蘇徐海道沛縣人；其一姓項，名籍，是現在江蘇徐海道宿遷縣人；二人俱是淮水流域民族出身，率領楚國遺民，在三年之中，顛覆秦室；但是大功告成以後，此二人卽起衝突；（註三）從此以後，又血戰了五年，劉邦起家平民，又年歲較長，性情陰險狡獪，諳練世故人情；項籍出身貴族。正當青年，性情粗暴率直，不明大勢；所以戰爭結果，還是項籍戰敗。劉邦自立爲皇帝，是爲漢

高帝，（註四）分封子弟爲大國，以輔衛中央政府，鎮壓各處人民；又用殘忍陰毒手段，殺害諸大將，於是中國境內一時小康，但是匈奴趁着機會又來入寇；（註五）匈奴英主冒頓單于，原是弑君弑父之亂臣賊子出身，性情陰鷙狠辣，尤在漢高帝以上；即位以後，先東滅滿洲蒙古混血族之東胡，占領現在熱河；西擊走回族之大月氏，烏孫，占領現在甘肅西北部甘涼安肅二道；又乘中國內亂，南下占領黃河套；於是現在內外蒙古地方，遂產出一個一統之遊牧大帝國。原來內外蒙古地方，氣候寒冷，雨量缺乏，地勢高燥，土脈磽瘠，河流太少，交通不便；匈奴人以肉爲食，酪爲漿，皮爲衣，穹廬爲室，氈帳爲牆，牛，馬，驢，騾，駱駝爲交通機關，各種家畜爲農產物品，所謂一方水土養一方人，却亦不甚感覺十分不方便；但是同南方漢族生活狀態比較：食是精米白麵，衣是綢緞麻布，住是高樓大廈，便覺珠玉在前，自慚形穢，欣慕艷羨不能自己，於是就時常想往中國來發財。漢族以農爲業：春天開始種地，天越熱越忙，到了冬天，糧食已收，地裏場裏俱無事，便收倉閉戶歇冬；匈奴人冬天頗能耐凍，夏天却很怕熱；彼等財產便是

家畜，家畜每年春天交尾，交尾以後，便領着家畜，找水草豐富之地方去歇夏；到了秋天，馬已肥，人已壯，家畜的生產之事已完，蒙古地方漸冷，中國境內亦漸涼，彼等便乘機會往南來侵畧漢族；大約每年秋冬之際，是彼等進兵時期；春夏之際，是彼等退兵時期；所以天愈熱，中國北方反比較着太平；天一冷，便覺着危險萬分，彷彿似高明之家，鬼瞰其室矣。匈奴來的目的：意在搶東西，不在占土地；漢族辛苦一年，直到收倉閉戶之後，匈奴人便盡情來一搶，將地裏所收，場裏所打，櫃裏所存，倉房裏所有之物，全數搜括一空；甚且擄掠人口，使男子爲奴，女子爲妾。原來蒙古地方，是一個高原，滋生之人口，受天然限制，男多女少；在西漢初年，蒙古尙未有喇嘛教，未見得匈奴之壯丁樂意鰥居，然則擄掠漢族婦女，滿足彼等結婚慾望一層。當然是彼等南寇之副目的無疑也。此種對於鄰家明火，打截，綁票，請財神之事，在秦朝全盛時代，本來不敢實行；但是秦亡漢興之交，中國境內，前後戰爭八年，壯丁死者數百萬，於是漢族戰鬥力驟減，匈奴便趁着機會來侵；漢高帝不知匈奴實力，自將來迎，在現在山西雁門

道大同縣城東，陷入匈奴伏中，被困在白登臺上；當時匈奴有四十萬馬兵，漢兵只有三十二萬，且多步兵，委是衆寡不敵；漢高帝不得已，用陳平祕計，遣間使暗中行重賂於閼氏，——匈奴皇后稱號——閼氏勸冒頓退兵，高帝僅而得免。復用劉敬策，以公主——皇帝女兒稱號——下嫁冒頓單于，從此以後，漢家歷代君主，時常遣公主下嫁，名爲和親；每年遣使臣帶着綢緞酒米及各種食物，往匈奴送禮，表面上裝作看閨女，實際上則等於納貢；匈奴單于一方面裝女婿，受贈品，一方面派兵來搶掠，卻是名利兼收；漢皇帝，一方面裝老丈人去撒冤，一方面又要受嬌客的侮辱，可真算慚愧無地矣。幸而高帝之子文帝，孫景帝全是英雄，一方面敷衍匈奴，一方面休養生聚，極力恢復漢族元氣。至高帝之曾孫武帝，更是一個不世出之大英雄，（註六）用遠交近攻策，聯絡匈奴之仇人大月氏，烏孫二國，商議夾攻匈奴；其時大月氏已經移到現在中央亞細亞之阿母河流域，距漢室領土太遠，不樂意來帮忙；烏孫移到現在天山北路，距漢室與匈奴的領土皆近，時常受匈奴侮辱，自己一國抵抗不住，便與漢家聯絡。武帝遣公主下嫁烏孫王，是爲漢回

二族結婚之始；公主之中有名解憂者，是個女英雄，遵着烏孫風俗，帶着犧牲性質，得了中國政府同意，前後下嫁烏孫三代君主，操縱政柄數十年；屢次趁着匈奴君主更迭之際，與漢室聯絡，東西出兵夾攻匈奴，匈奴很受許多打擊。(註七)至宣帝時代，匈奴弟兄爭國，內亂大起；有名呼韓邪者，稱臣納貢，求保護於漢；借漢家勢力，擊敗其弟兄，統一匈奴內部，從此以後，匈奴便成爲漢家之保護國矣。

(註一)、看中國史第二編第一，二頁秦始皇之統一政策

(註二)、看中國史第二編第十一至十五頁秦之衰亡

(註三)、看中國史第二編第十七至二十四頁楚漢之爭

(註四)、看中國史第二編第二十五，六頁漢初封建之由來

(註五)、看東洋史第二編第二頁至第八頁匈奴之勃興

(註六)、看東洋史第二編第五十至六十二頁張騫之奉使，烏孫之分合，二章

(註七)、看東洋史第二編第六十七至八十二頁匈奴之末路

## 第四章 漢族第二次蛻化時代 三國兩晉南北朝

### 小引

漢族第二次蛻化，在三國兩晉南北朝時代，其新加入之血統有六：曰匈奴，曰烏桓，曰鮮卑，曰氐，曰羌，曰巴氏；匈奴之大部落有四：曰新興劉氏，爲前趙之祖，曰武鄉石氏，爲後趙之祖，曰新興赫連氏，爲夏之祖，曰張掖沮渠氏，爲前爲北涼之祖；烏桓之大部落有四：曰上谷難樓，遼西丘力居，遼東蘇僕延，右北平烏延；鮮卑之大部落有六：曰遼東慕容氏，爲前燕，後燕，西燕，南燕及吐谷渾之祖，曰遼西段氏，曰遼西宇文氏，後爲北周之祖，曰代郡拓跋氏，爲後魏之祖，曰隴西乞伏氏，爲西秦之祖，曰河西禿髮氏，爲南涼之祖；氐之大部落有三：曰畧陽楊氏，爲仇池之祖，曰畧陽苻氏，爲前秦之祖，曰略陽呂氏，爲後涼之祖；羌之大部落曰南安姚氏，爲後秦之祖；巴氏之大部落曰巴西宕渠李氏，爲成之祖；是爲五胡十六國及北朝之創始者。匈奴烏桓鮮卑之前身，爲春秋時代之北狄，氐羌之前身，爲春秋時代之西戎，北狄西戎之雜居中國者，在戰國末年，

已完全同化於漢族，匈奴烏桓鮮卑係北狄同族子孫，氐羌係西戎同族子孫，東漢時代，新從塞外移至中國者，非其直係苗裔；巴氏爲春秋時代巴人之後，係苗藏混血族，始終雜居中國者，乃南蠻西戎之直係苗裔也。茲述其事蹟如左：

### 第一節 匈奴血統之加入

一，前趙劉氏及後趙石氏 西漢末年，王莽篡位，匈奴乘中國內亂，侵略中國北邊；光武帝中興，匈奴又內亂，國分爲二，一部分降漢，移到現在綏遠特區之五原縣，史書上稱之曰南匈奴；一部分留住漠北，與南匈奴互相攻擊，史書上稱之曰北匈奴。章帝章和元年，——西歷紀元八七年——鮮卑大破北匈奴兵，斬其優留單于，其部下屈蘭儲等五十八部，口三十八萬降漢。和帝永元初年，大將軍竇憲伐北匈奴，大破其兵；北匈奴西走，輾轉渡烏拉河，移入歐洲，侵畧羅馬帝國北境，據多腦河下流流域，休養生息，是爲後世匈加利王國及當代匈加利共和國的前身。(註二)南匈奴移到黃河套內，與漢族雜居，休養生聚百餘年，戶口逐漸繁衍；與編戶大同，而不輸貢賦，當時輿論恐其滋蔓難制，欲豫爲之防。漢獻帝建

安二十一年，——西歷紀元二一六年——單于呼厨泉入朝於魏，魏王曹操以丞相資格當國，留之居鄴，——今河南河北道安陽縣——使右賢王去卑監其國，單于歲給綿絹錢穀，與漢家列侯受同等待遇，子孫襲號；分其衆爲五部，各立其貴人爲帥，選漢人爲司馬以監督之，居并州——今山西省及綏遠特區——境內，南匈奴自謂其先本漢室之甥，因冒姓劉氏，是爲西晉末年五胡亂華的禍首劉淵之祖。（註二）

東漢末年，中國大亂，羣雄蜂起，割州據郡，互相殘殺；經過三國到西晉，前後幾及百年，——漢靈帝中平元年，西歷紀元一八四年，黃巾賊起！至晉武帝太康元年，西歷紀元二八〇年，晉滅吳，天下一統，前後共九十七年。——中國壯丁戰死原野，老弱轉乎溝壑，全國人口減去七分之六。——東漢全盛時代，人口約五千三百萬有奇；三國時代，僅七百萬有奇。——晉室統一中國，一時中國內部，仍集權於中央；但裁撤軍備過甚，平吳之年十二月，悉罷州郡兵，大郡置武吏百人，小郡五十人，於是對外的抵抗力，對內的彈壓力驟弱。司馬懿，師，昭，炎祖孫父子，以曹魏世臣，欺人寡婦孤兒，狐媚以取天下，取之太易，故保持亦不肯



盡力；司馬炎平吳以後，選擇吳宮妓妾五千人入宮，頗事遊宴，怠於政事，荒於酒色，寢成痼疾。炎之嫡長子惠帝衷爲人癡呆，嘗在當時皇室離宮華林園中聞蛙鳴聲，問左右曰：「此鳴者爲官乎？爲私乎？」時天下荒饉，百姓多餓死；帝聞之曰：「何不食肉糜」？由是權在羣下，政出多門，勢力之家，更相薦託，有如互市。惠帝皇后賈南風係助着司馬昭弑魏高貴鄉公曹髦的賊臣賈充之女，偷了皇帝恩賜父親的異香贈給情夫韓壽的賈午之姊，性妬忌多權詐，乘機盜弄國柄，驕恣專橫，內行不修，弑太后楊氏，殺太子適，剪除異己之大臣，激而成八王之亂，宗室諸王互相攻擊，互相殘殺，（註三）中原鼎沸，全國瓦解。南匈奴酋長左賢王淵，係呼厨泉姪孫，久居洛陽爲質子，通經史，習騎射，乘西晉八王之亂，畧取山西西部，自稱漢帝，建都平陽。淵卒，子聰襲位，以從兄弟曜及現今山西冀寧道武鄉縣匈奴別部之羯人石勒等爲大將，先後攻陷洛陽，長安，弑晉懷，愍二帝，遂滅西晉。（註四）聰卒，子粲襲位，爲部將靳準所弑。劉氏男女無少長皆見殺。當時劉曜以相國雍州牧資格，鎮守長安，聞警，舉兵討內亂，因自立爲帝，

遷都長安，改國號趙，史稱前趙。石勒以大將軍幽冀二州牧資格，鎮守河北，聞警，自現在直隸境，引兵入山西，赴難，討準，斬之；旋與曜起衝突，自立爲趙王，據現今京兆直隸河北山西等地，史稱後趙。勒旋破曜，滅前趙，取河南西部，陝西中部及甘肅東部，復南侵東晉，取河南東部及淮北，於是黃河流域皆入於後趙。（註五）勒傳六世，至姪孫鑒，爲部將冉閔所篡，盡滅石氏，殘殺胡羯二十餘萬人，是爲匈奴入中國後一大劫。鮮卑酋長慕容儁乘機由遼河流域西南下，入山海關，佔領京兆，南攻直隸，大破閔兵，殺閔，畧取黃河下流流域，於是現在直隸，山東，山西，河南境內，少數子遣之匈奴人，皆在鮮卑勢力範圍之下，混合於漢族；（註六）而黃河上流綏遠特區一帶，猶爲匈奴劉氏遺族所據。

二，夏赫連氏 赫連氏爲匈奴右賢王去卑之後，先是東漢末年，魏王曹操當國，留南單于呼廚泉居鄯，使右賢王去卑監其國。去卑卒，子猛襲爵，晉武帝泰始七年，卜西歷紀元二七一年——叛走出塞，寇并州，爲左部將所殺，從子虎代領其衆，居新興。——今山西雁門道忻縣——劉淵叛晉，虎附於淵，淵以爲樓煩公，屢

與建都現在山西雁門道大同縣，鮮卑酋長拓跋氏之代搆兵，皆爲代所敗。虎卒，子務桓立，求和於代，代王什翼犍以女妻之，自此以後，羈縻於代。傳三世，至衛辰，稱臣於建都現在陝西長安之氐族酋長前秦苻氏，請田於中國陝西邊地，春來秋返，秦王堅許之；復求婚於代，什翼犍妻以公主；衛辰狡猾多變，介居秦代之間，利用兩大，使之互相牽掣；什翼犍屢自將擊之，衛辰兵敗，請降於秦。晉孝武帝太元七年，—西歷紀元三八二年—引秦兵滅代，秦王堅分代爲二部，以西部隸衛辰；衛辰屢與東部酋長，代王什翼犍故將劉庫仁搆兵，爲庫仁所敗。太元十一年，—三八六年—什翼犍諸故將復奉什翼犍之孫珪爲代王，取大同故地，與衛辰爲敵。十六年，—三九一年—衛辰遣子直力鞬以重兵攻珪，珪以輕兵擊破之，乘勝追奔，自五原南濟河，徑入其國，衛辰部落駭散，衛辰出走，爲其部下所殺；珪誅其宗黨五千餘人。（註七）衛辰少子勃勃亡奔長安，降於羌族建立之後秦；後秦王姚興以勃勃爲將軍，配以雜虜—各族混合之稱—二萬餘落，使鎮朔方。勃勃旋叛後秦，自稱大夏天王，築都城於朔方黑水之南，名曰統萬，—故城在今

陝西榆林道橫山縣——自謂其祖從母姓劉，非禮，改姓赫連氏。（註八）晉安帝義熙十三年，——西歷紀元四一七年——宋武帝劉裕爲晉大將，以晉兵滅後秦，留其十二歲之次子義真爲安西將軍，守長安，而使諸大將王修，王鎮惡，沈田子等爲幕僚以佐之。田子與鎮惡爭權，矯裕令殺鎮惡，修討田子，誅之，義真信讒，復殺修，關中大亂，勃勃乘機襲陷長安，敗晉兵，逐義真，自稱皇帝。宋文帝元嘉二年，——西歷紀元四二五年——勃勃殂，子昌立，魏太武帝燾乘機西侵，襲破統萬，昌奔上邽，——縣名——故城在今甘肅渭川道天水縣西南——爲魏追兵所執；弟定自立爲皇帝，西攻南安，——郡名——故城在今甘肅蘭山道隴西縣渭水北——滅鮮卑酋長乞伏氏之西秦；旋自治城濟河，欲擊建都於現在甘肅甘涼道張掖縣之匈奴酋長北涼王沮渠蒙遜，鮮卑慕容氏之別部酋長吐谷渾王慕璿方據有青海，遣兵乘其半濟邀擊之，大破其兵，執定，送於魏，夏亡。（註九）匈奴劉氏無復尺土，獨其別部沮渠氏猶在。

三，北涼沮渠氏 北涼王沮渠蒙遜本匈奴酋長沮渠王後，世居張掖，——縣名

屬今甘肅甘涼道——事占領現今甘肅北部之氏族酋長後涼王呂光。晉安帝隆安元年，——西歷紀元三九七年——舉兵叛後涼，推建康——郡名——故城在今甘肅安肅道高臺縣——太守段業爲盟主，旋弑業，自稱涼州牧，張掖公，史稱北涼。（註十）乘後涼之衰，屢東向擴張領土，復破據有現今甘肅西部之鮮卑酋長南涼禿髮氏，徙據姑臧。——今甘肅甘涼道武威縣——夏亡後，東與後魏接境，稱臣納質入貢於魏，魏拜蒙遜都督涼州西域羌戎諸軍事，涼州牧，封涼王。蒙遜殂，子牧犍立，後魏太武帝以妹武威公主妻之；旋與後魏構兵，宋文帝元嘉十六年，——西歷紀元四三九年——爲魏所滅，黃河上流流域皆入於後魏，甘肅綏遠境內匈奴遺族皆在鮮卑拓跋氏勢力範圍之下，被同化於漢族。（註十二）

## 第一節 烏桓血統之加入

中國北方之民族有三：曰通古斯族，曰蒙古族，曰突厥族；突厥族與漢族之接觸，始於前漢初年之大月氏，烏孫。通古斯族，蒙古族與漢族之接觸，則遠在有史以前，時代無由推定。由來蒙古族之起源地，在現今外蒙古中部圖拉河，鄂

爾渾河，薛靈哥河流域，通古斯族之起源地，在現今長白山下烏蘇里江，松花江流域，兩地皆苦寒，農產物缺乏，兩民族爲天然現象所驅，常思逐漸南下，經過數千百年，遂移到現在萬里長城近傍，血統逐漸混合，成爲一種特別新民族。代表此特別新民族者，在戰國末年，有二大部落：一部落在西方，據有現在綏遠特區及陰山北一帶，以蒙古族爲主要血統，史書上稱之曰匈奴。一部落在東方，據有現在熱河特區，以通古斯族爲主要血統，史書上稱之曰東胡。此二部落在戰國末年即時常起衝突，西漢初年，匈奴冒頓單于滅東胡，東胡遺族東走，一保烏桓山，——在現在內蒙古阿魯科爾沁西北一百四十里俗名烏聯山——一保鮮卑山，——見下節——因以地名爲族號。烏桓領土在鮮卑南方，占領現在遼河上流西喇木倫，老哈木倫流域，舊常臣服匈奴。漢武帝時，驃騎將軍霍去病攻匈奴東部，烏桓請降，朝廷徙其部落於上谷，——今直隸口北道——漁陽，——今京兆——右北平，——今直隸津海道北部熱河特區東南部，——遼東，——今奉天遼瀋道東部——遼西，——今奉天遼瀋道西部——五郡塞外，爲漢偵察匈奴動靜，置護烏桓校尉監領之，是爲烏桓南

遷之始。其後休養生息，部衆漸強，昭帝元鳳三年，——西歷紀元前七八年——舉兵叛漢，漢遣將擊破之。新莽及光武時，復屢次南侵，代郡——今山西雁門道東部——以東，尤被其害，其居止近塞。朝發穹廬，暮至城郭，五郡民庶，家受其辜，朝廷屢發兵擊之，不克。

東漢初年，匈奴內亂，烏桓乘勢擊破之，匈奴走外蒙古，漠南空虛；光武帝以幣帛賂烏桓，其大人等皆來降，詔封其渠帥爲侯，王，君，長者八十一人，皆居塞內，布於緣邊，爲漢偵候，助擊匈奴。復置護烏桓校尉於上谷寧城——今口北道萬全縣——以監領之，開府營田，歲時互市；歷明帝，章帝，和帝三代，與中國相安無事。

安帝即位，烏桓復叛，與鮮卑及南匈奴聯兵寇邊，朝廷遣兵擊破之。自此以後，時叛時服，東北騷然。靈帝初，烏桓大人上谷有難樓者，衆九千餘落，遼西有丘力居者，衆五千餘落，皆自稱王；遼東蘇僕延，衆千餘落，自稱峭王；右北平烏延，衆八百餘落，自稱汗魯王。前中山太守張純叛入丘力居衆中，諸部奉之

爲帥，屢寇河北山東諸郡，幽州牧劉虞遣客刺殺純，其禍乃已。獻帝初平中，——西歷紀元一九〇至一九三一丘力居死，子樓班年少，從子蹋頓有武畧，代立，冀州牧袁紹與前將軍公孫瓚爭幽州，蹋頓發兵助紹擊瓚，破之，紹矯制，賜蹋頓，難樓，蘇僕延，烏延等以單于印綬。後樓班年長，難樓，蘇僕延等，奉樓班爲單于，以蹋頓爲王，然蹋頓猶秉計策。袁紹卒後，曹操發兵爭河北，紹子熙，尙兵敗，奔蹋頓，欲憑藉其勢力恢復河北；建安十二年，——西歷紀元二〇七年——操自將征烏桓，大破蹋頓於柳城，——今熱河凌源縣——斬之，首虜二十餘萬人，其餘衆萬餘落悉徙居中國；自此以後，烏桓勢力不復振，其遺族大半同化於漢族。（註十二）

### 第三節 鮮卑血統之加入

一，檀石槐 鮮卑亦東胡苗裔，東胡亡後，走保鮮卑山，——在今內蒙古科爾沁右翼西三十里——土人呼爲蒙格——附屬於匈奴。其地遠在熱河北部，南與烏桓接壤，故未嘗通中國；光武帝時，匈奴強盛，屢率鮮卑寇抄北邊，遼東太守祭彤大



破之，窮追出塞，鮮卑震懾，其都護偏何率種人來降，屢爲漢擊北匈奴及烏桓，有功，朝廷厚遇之，鮮卑悅服；其大人皆來歸附，並受賞賜，每年由青，徐二州給與錢二億七千萬，歷明，章二帝，保塞無事。

和帝永元初年，——西歷紀元八九年——大將軍竇憲擊破北匈奴，北單于遁走阿爾泰山西，輾轉西下，移入東歐。漢廷既不使南單于北歸漠北之單于庭，復不派兵屯田漠北，經營其地使被漢化，外蒙古境內空虛，鮮卑乘勢北下占領其地，匈奴餘種留者尙有十餘萬落，皆降於鮮卑，鮮卑由此漸盛，屢寇東北諸郡，殺掠人畜無算。桓帝時代，其大人檀石槐在位，勇健有智畧，諸部推爲共主，立庭於彈汗山——在今察哈爾張北縣附近——斡仇水上，去高柳——故城在今山西雁門道陽高縣——北三百餘里；南抄中國之緣邊，北拒貝加爾湖近傍突厥民族之丁零，東徂吉林西境之夫餘，西擊天山北路之烏孫，盡據匈奴故地，鮮卑勢驟張；自分其地爲三部，各置大人領之。朝廷患其強，遣使持印綬，封爲王，欲與和親，檀石槐不肯受；屢寇直隸山西北部，沿邊胥受其禍，朝廷發兵三路擊之，皆敗績，死亡甚衆

。靈帝初年——西歷紀元一六八年——檀石槐卒，子和連代立；出攻北地，——今甘肅涇原道——中流矢卒；子騫曼幼，兄子魁頭代立。後騫曼年長，與魁頭爭國，衆遂離散，復分爲若干部落。（註十三）

二，燕慕容氏 三國時代，中國內部分裂，漢族互訐者六十餘年，無暇注意外族，鮮卑各部落乘勢暗長潛滋，養勢力於塞外。晉室統一中國，一時中國境內，仍集權於中央，而對外之抵抗力驟弱；南匈奴遺族劉氏乘機叛亂，畧取黃河流域，自稱漢帝，滅西晉之帝室；於是鮮卑酋長慕容氏據遼東，段氏據遼西，宇文氏據熱河，拓跋氏據察哈爾，與匈奴劉氏，石氏，競爭黃河流域。慕容氏累代多英主，併吞段氏，宇文氏領土，建國號曰燕，稱燕王；復滅後趙石氏，畧取黃河中流下流流域，稱皇帝，是爲前燕。（註十四）其第一代君主廆之庶長兄吐谷渾分部西下，畧取甘肅西南部洮水以西及青海東部，自立爲河南王，是爲吐谷渾國。（註十五）圖伯特族之前秦苻氏勃興，憑藉陝西爲根據地，畧取黃河流域全土，滅前燕，徙慕容氏之族於長安。（註十六）晉孝武帝太元八年，——西歷紀元三八

三年——前秦王苻堅大舉兵南侵晉，戰於現在安徽淮涇道壽縣境內之淝水，爲晉大將謝石，謝玄叔侄所敗，各國遺民乘機蜂起叛秦，秦室瓦解；前燕第二代君主皝之子垂起兵據河北，奠都中山，——今直隸定縣——自稱皇帝，是爲後燕；（註十七）前燕第三代君主僞之子冲起兵畧關中，破長安，稱皇帝，是爲西燕；（註十八）冲爲其下所弑，五傳而至慕容永，移據長子，——今山西冀寧道長子縣——將與後燕爭河北；晉孝武帝太元十九年，——西歷紀元三九四年——後燕主垂滅西燕，殺永，於是現今山西中部，南部皆入於後燕。（註十九）而拓跋氏之代王珪，已取現今察哈爾，綏遠全部及山西北部，遂南下侵畧後燕西境。

三，後魏拓跋氏 拓跋氏舊居外蒙古東部鄂嫩河，克魯倫河流域，其俗辮髮爲飾，史書稱其部落曰索頭。至酋長毛，始彊大，統國三十六，大姓九十九。傳五世至酋長推寅，南遷大澤。又七世至酋長鄰，分部衆爲十族。鄰老，子詰汾立，南遷匈奴故地。詰汾卒，子力微立，移居定襄之盛樂，——故城在今山西雁門道大同縣西北——始遣長子沙漠汗入貢於魏，因留爲質子。力微卒，四傳而至祿官

，分其國爲三部，登庸中國人才，漢族附者稍衆。祿官從子猗匄時爲分國首領，助晉并州刺史東嬴公騰討前趙劉淵，有戰功，詔假猗匄大單于。祿官卒，兄子猗盧立，助晉并州刺史劉琨討匈奴別部劉虎，有戰功，詔拜大單于，封代公。猗盧以封邑去國懸遠，民不相接，乃帥部落萬餘家，自雲中——今綏遠東部——入雁門，——今山西雁門道——從琨求陁北——今恆山脈以北——之地；琨欲倚之爲援，乃徙樓煩，——今山西雁門道神池——五寨二縣地——馬邑，——今雁門道朔縣——陰館，——今雁門道勾注山北代縣西北部及山陰縣全境——繁峙，——今雁門道繁峙縣——崞，——今雁門道崞縣——五縣民於陁南，以其地與猗盧，於是國勢益盛；旋以助琨討前趙，有戰功，進爵爲王。晉愍帝建興四年，——西歷紀元三一六年——長子六脩作亂，弑猗盧，猗匄之子普根起兵討殺六脩而自立，未幾而卒，國人立其從弟鬱律。鬱律英武，善用兵，擊匈奴酋長劉虎，大破之，西取烏孫故地，——今新疆伊犁道——東兼勿吉以西，——今吉林黑龍江等地——士馬精強，雄於北方。猗匄妻惟氏嫉其強，弑之，自專國政；四傳而至鬱律之子什翼犍，雄勇有智畧，能修祖業，號令明白，

政事清簡，國人安之；於是東自濊貊，——今吉林東部及朝鮮北部——西及破落那，——今俄領中亞費爾干省——南距陰山，——在今綏遠特區北境——，北盡沙漠，率皆歸服。

晉孝武帝太元元年，——西歷紀元三七六年——什翼犍與劉虎之孫衛辰構兵，衛辰求救於前秦，前秦王苻堅乘釁發兵攻代，什翼犍之庶長子寔君作亂，弑什翼犍，並殺諸弟，秦人討殺寔君，遂滅代；（註二十）分代舊地爲二部，使劉衛辰與代故南部大人劉庫仁分領之，自河以東屬庫仁，以西屬衛辰。什翼犍之世子寔早夭，有遺腹子曰珪，尙幼，代亡，珪母賀氏以珪依庫仁；庫仁招撫離散，恩信甚著，奉事珪恩勤周備，不以廢興易意。太元九年，——三八四年——後燕主慕容垂起兵叛秦，攻鄴，前秦守將請救於庫仁；庫仁擊後燕兵，敗之，將大發兵救鄴，爲後燕降人慕輿文所刺，弟頭眷代領其衆，子顯復弑頭眷而自立，謀害珪，珪奔賀蘭部，依其舅賀訥。太元十一年，——三八六年——訥與諸部大人復奉珪爲代王，都盛樂，於是代絕十年而復續；旋改國號曰魏，史稱後魏，是爲中國北朝之始。劉

顯地廣兵強，雄於北方，珪乘其兄弟乖爭，擊滅之；復西攻劉衛辰，衛辰敗走，爲其下所殺，珪遂滅其國，於是現今察綏二區及山西北部復入於魏。（註二十二）珪以後燕主垂衰老，太子寶闇弱，子弟用事，陰有圖燕之志；太元二十年，——三九五年——侵逼附塞諸部，燕遣太子寶將兵擊之，戰於參合陂，——在今山西雁門道陽高縣東北邊牆外——燕兵大敗，死者甚衆。次年，垂自將擊魏，破之，還至上谷——今直隸口北道——而卒，寶卽位；寶素庸愚，士民失望，魏王珪乘隙自將擊燕，連破并州——今山西冀寧道河東道——冀州——今直隸大名道河南河北道——，諸郡，遂圍其都城中山；——今直隸保定道定縣——寶懼，率皇族近臣奔龍城，——今熱河朝陽縣——於是現今京兆，直隸，山西及河南北部皆入於魏。寶旋爲其下所弑，傳子盛，弟熙及熙養子高雲，皆不得令終，將軍馮跋遂自立，慕容氏之統中絕，皇室歸於漢族，自此以後，史稱北燕。（註二十二）跋傳一世至弟弘，爲魏所滅，於是現在奉天遼河以西及熱河特區南部皆入於魏。（註二十三）寶叔父德率燕遺民南渡河，侵畧晉室領土，盡取現在山東全省，自稱皇帝，史稱南燕。德卒，傳其兒子超，爲

晉大將劉裕所滅，慕容氏之系絕；（註二十四）獨吐谷渾之子孫世據青海，與中國北朝相持，傳十九世，三百四十七年，至唐高宗龍朔三年，——西歷紀元六六三年——始爲西藏境內圖伯特族之吐蕃所滅。其遺族奔唐，唐處之靈州，——今甘肅寧夏道——仍可汗故號，傳四世，爲吐蕃所逼，移居朔方河東；——今綏遠東部——唐德宗貞元十四年，以慕容復襲位，復卒，停襲，慕容氏之封爵從此遂絕，其遺族皆同化於漢族。（註二十五）然猶保存其特別部落，至後五代時，猶有相當勢力，梁晉虎爭之際，往往利用其勢力，使之牽掣敵國云。（註二十六）

四，西秦乞伏氏及南涼禿髮氏 以上所舉，爲慕容氏及拓跋氏部落混合於漢族之始末，其年代大體在兩晉時代，其區域大體在黃河中流下流流域，至於黃河上流流域，則除去吐谷渾外，鮮卑之部落尙多。先是曹魏末年，安西將軍鄧艾鎮隴右，納鮮卑降人數萬，置於雍涼之間，與民雜居，有乞伏氏者，居於隴西之苑川，——今甘肅蘭山道金縣——前秦衰亡時代，其酋長國仁，乘機畧取現在蘭山道，自立爲苑川王，使書稱之曰西秦，傳四世至暮末，爲夏主赫連定所滅。（註二十七）

有禿髮氏者，世居河西，晉武帝時，其酋長樹機能作亂，攻秦州，——今甘肅南部——殺刺史，復陷涼州，——今甘肅北部——旋爲晉所討殺，從弟務丸代領其衆。傳三世至烏孤，雄勇有大志，遂乘前秦末年之騷亂，畧取現在甘肅西寧道，自立爲西平王，史書稱之曰南涼（註二十八）。傳二世至儁檀，爲西秦王乞伏熾磐所滅，（註二十九）西秦旋滅於夏，夏復爲吐谷渾所滅，其故地皆入於魏，於是現在直隸，山西，陝西，甘肅四省，京兆，察哈爾，綏遠三區與奉天西部，熱河南部，皆爲拓跋氏所有，史稱北朝。北朝歷代多英主，進兵侵畧淮水，漢水及揚子江上流流域，與代表漢族之南朝爭霸於中原，南朝屢戰屢敗，宋營陽王初年，——西歷紀元四二三年——失河南；宋明帝初年，——四六六年——失山東及淮北；齊明帝末年，——四九八年——失沔北；——今湖北襄陽道——東昏侯初年，——五〇〇年——失淮南；——今安徽淮泗道——梁武帝初年，——五〇五年——失漢中；——今陝西漢中道——晚年，——五四九年——失江北；——今安徽安慶道——江蘇淮揚道——梁元帝二年，——五五三年——失四川；三年，——五五四年——失湖北；陳室建國時代，南朝只餘現在湖南，江西，廣



東，廣西，浙江，福建及江蘇，安徽南部，約當中國本部三分之一，於是鮮卑民族之勢力範圍，擴張到淮水，漢水及揚子江上流流域。（註三十）後魏歷代君主，多崇拜中國文化，太武帝燾好道，孝文帝宏好儒，文成帝濬，獻文帝弘，宣武帝恪，孝明帝詡與獻文帝之太后馮氏，孝明帝之太后胡氏皆好佛；累朝提倡中國文化，不遺餘力，自皇族貴族起，首先同化於漢族，於是鮮卑民族全體從風而靡，文化程度驟然發達，國民性逐漸消滅。

五，北齊高氏及北周宇文氏 後魏晚年，國分爲二，東魏滅於北齊，西魏滅於北周，北齊皇室高氏，北周皇室宇文氏，血統雖俱爲鮮卑民族，然文化仍承襲漢民族。其後北齊滅於周，周滅於隋，隋復滅於唐；名義上的血統雖仍爲漢民族，然事實上隋唐皇室皆雜有鮮卑血統，非純粹漢族。自此以後在中國境內之鮮卑民族皆同化於漢族，惟移居西伯利亞之一部分爲例外。

#### 第四節 氐羌血統之加入

一，氐羌之起源 西藏民族原有戎，氐，羌等之區別，西周末年，戎人異常

猖獗，侵入陝西渭水流域，滅漢族共主之西周，代表漢族之嬴秦，與之角逐於現今陝甘二省者數百年，始完全使我人同化於漢族；而氐羌二族僻居青海內地，距中國懸遠，與秦室無直接接觸。其後羌人沿黃河上流，氐人循秦嶺山脈東下，蔓延於現在甘肅西境；漢武帝元鼎五年，——西歷紀元前一二年——西羌反，次年，討平之，是爲羌人與漢族以武力接觸之始。昭帝元鳳元年，——西歷紀元前八〇年——武都——郡名今甘肅渭川道武都，文，成，徽及陝西漢中道寧羌縣等地，——氐人反，遣兵擊之，是爲氐人與漢族以武力接觸之始。武帝開河西四郡，隔絕羌與匈奴人往來之路，斥逐諸羌不使居湟中，——湟，水名，今西寧河，湟中，卽湟水流域，今甘肅西寧道及青海東北部，——於是現在甘肅西寧邊外入於漢。宣帝在位，——西歷紀元前六一年——先零羌反，詔遣後將軍趙充國將兵擊之，充國屯田湟中，堅壁清野以老其師，羌人大困，遂殺其渠以降，置金城——郡名今甘肅蘭山道——屬國以處其衆。

王莽專政，收西羌地，置西海郡，徙罪人實之，羌人怒莽奪其地，遂反，其

後諸羌入居塞內，金城屬縣多爲所有，隗囂據隴西，利用羌人爲援，鎮撫西方。自是以後，經過東漢一代，幾二百年，羌人時常乘機作亂；其中燒當，先零二族最強，其侵畧範圍，南至漢中，東至河東，——今山西河東道——河內，——今河南河北道西部——陝甘二省全境屢被兵燹，朝廷雖數發大兵征之，勞費經年，卒無勝算。（註三十）

已而三國分裂，氐，羌二族住居地與魏，蜀二國接境，二國爭欲引爲援以抗敵人，時常發生國際關係。晉室統一中國，一時武力廢弛，鮮卑，匈奴侵入中國東北方，占領黃河中流，下流流域，氐，羌二族亦乘機勃起於西方，侵畧黃河上流流域，其中嶄然露頭角者，曰仇池楊氏，前秦苻氏，後秦姚氏，後涼呂氏。

二，仇池楊氏 仇池楊氏之祖駒，本畧陽——郡名今甘肅渭川道北部——清水——今甘肅渭川道清水縣——氐人，始居仇池，——山名在今渭川道成縣——仇池方百頃，其旁平地二十餘里，四面斗絕而高，羊腸蟠道三十六回而上，其孫千萬稱臣於曹魏，封爲百頃王。千萬孫飛龍寢強盛，徙據畧陽，——今陝西漢中道畧陽縣——晉惠

帝元康六年，——西歷紀元二九六年——飛龍養子茂搜避秦雍氐羌齊萬年之亂，還保仇池。元帝建武元年，——西歷紀元三一七年——茂搜卒，子難敵襲位，乘晉室之衰，盡取現今漢中道西北部，渭川道南部，稱臣於前趙。成帝咸和九年，——三三四年——難敵卒，子毅立，族兄初弑之而自立，稱臣於後趙。從此以後，國多內亂，勢漸不振，又傳五世至纂，遂爲前秦王苻堅所滅，隴西皆入於前秦。（註二十三）

三，前秦苻氏 前秦始祖蒲洪，本畧陽臨渭——縣名，畧陽郡治，故城在今渭川道秦安縣東北、——氐酋，驍勇多權畧，群氐畏服之。晉懷帝永嘉四年，自稱護氐校尉，秦州刺史，畧陽公。前趙主曜遷都長安，洪降於趙，封率義侯。前趙亡後，洪降於後趙，後趙主石虎徙秦——州名今甘肅南部——雍——州名今陝西關中道榆林道——民及氐，羌數十萬戶以實東方，拜洪流民都督，居枋頭。——今河南河北道淇縣——虎疾篤，拜洪都督雍秦諸軍事，雍州刺史，封畧陽郡公。虎卒，子遵立，罷洪都督，洪怒，歸枋頭；秦雍流民相率西歸，路由枋頭，共推洪爲主，衆至十餘萬。是時後趙衰亂，洪陰有保據關右之志，後趙大將，駐札現在直隸大名道清

河縣之羌酋姚弋仲遣兵擊洪，洪迎擊破之，自稱大都督，大將軍，大單于，三秦王，改姓苻氏。晉穆帝永和六年，——西歷紀元三五〇年——故趙將麻秋鳩殺洪，洪子健斬秋，自稱晉征西大將軍，都督關中諸軍事，雍州刺史，率師西上，三輔郡縣皆降，遂入長安，稱皇帝，國號秦，史書稱之爲前秦。傳二世至從子堅，知人善任，以王猛爲謀主，授以國政；盡滅前燕，仇池，前涼，代等國，統一黃河流域；復南侵晉，盡取現在四川全省及湖北，安徽，江蘇三省北部；晉以謝安爲宰相，以桓冲都督荆——州名今湖北——江——州名今江西——等州軍事，守揚子江中流，安兄子玄監江北諸軍事，守揚子江下流流域以拒之。晉孝武帝太元八年，——西歷紀元三八三年——堅大舉南侵晉，安以弟石爲元帥，侄玄爲前鋒，子琰爲偏將，率師拒戰於淝水，——水名——源出今安徽安慶道合肥縣西北鷄鳴山——北流分爲二——其一東南入巢湖——其一西北入淮水——此當指入淮水一支而言——在今淮泗道壽縣境內——大破秦兵，殺其大將皇弟陽平公苻融，堅棄軍走還長安。前燕皇族慕容垂，乘機起兵據河北，慕容冲起兵畧關中，長安不能守，太元十年，——三八五年——堅出

奔五將山。——在今陝西關中道岐山縣北三十里——部將姚萇叛，畧取現在甘肅涇原道，自稱秦王，史書稱之爲後秦，遣兵圍五將山，執堅以歸，弑之。堅子丕時以冀州牧資格，屯兵於鄴拒慕容垂，不能取勝，棄河北，退守晉陽，——今山西冀甯道太原縣——得堅凶聞，發喪即位。次年，爲西燕所逼，渡黃河，南走東垣，——今河南河洛道新安縣——將襲洛陽；時河南已爲謝玄所恢復，玄部將馮該自陝邀擊丕，殺之。丕族子登時以雍河二州牧資格，鎮守南安，——郡名——故城在今甘肅蘭山道隴西縣渭水北——與隴右豪傑，共舉義兵，討姚萇；聞警，發喪即位，鼓勵部族，與後秦血戰八年，卒爲後秦所破，被殺；太子崇立，旋與西秦乞伏氏衝突，敗死，前秦亡，（註三十四）氐人勢力驟衰，惟後涼呂氏猶在。

四，後涼呂氏 後涼王呂光亦略陽氐人，前秦太尉呂婆樓之子，事前秦王堅，爲驍騎將軍，晉孝武帝太元七年，——西歷紀元三八二年——奉堅命，伐西域，越流沙，焉耆——今新疆阿克蘇道焉耆縣——等國皆降，進破龜茲，——今新疆阿克蘇道庫車縣——欲留居之，從天竺沙門鳩摩羅什勸，乃還。十年，至涼州，會中原已亂

，堅已死，涼州刺史梁熙謀閉境拒光；光擊殺熙，入姑臧，——今甘肅甘涼道武威縣——自領涼州刺史，旋自稱大都督，大將軍，涼州牧，酒泉公，尋自稱三河王，復自稱涼天王，史書稱之曰後涼。光猜忌，多殺大臣，用法嚴而無恩，士民不附；鮮卑酋長秃髮烏孤乘機畧取其南部，——今蘭山道西部及西寧道——是爲南涼；匈奴遺族沮渠蒙遜乘機畧取其西部，——今甘涼道張掖縣以西——是爲北涼；光年老，諸子爭權，大臣外叛，國勢寢衰；屢與南涼北涼構兵，後涼多敗，西方諸郡皆爲二國所取。隆安三年，——西歷紀元三九九年——光卒，太子紹立，庶兄纂弒而代之；五年，——四〇一年——從弟超復弒纂而立其兄隆，隆多殺豪望，人不自保；後秦乘機來攻，隆兵敗，請降於後秦，後涼亡，『註三十五』於是陝甘境內氐族皆夷爲平民，惟羌人之後秦猶盛。

五，後秦姚氏 後秦始祖姚萇，本南安赤亭——今蘭山道隴西縣——羌人，羌酋燒當之後也。東漢初年，燒當七世孫填虞寇擾中國西方，將軍馬武擊敗之，填虞走出塞。東漢末年，填虞九世孫遷那率種人來降，漢廷嘉之，處之赤亭。遷那玄

孫柯迴生弋仲，始以姚爲姓。弋仲少英毅，不營產業，惟以收恤爲務，衆皆畏而親之。永嘉之亂，——西歷紀元三一二年——東徙榆眉，——故城在今陝西關中道汧陽縣東南——戎夏襁負隨之者數萬，自稱護西羌校尉，雍州刺史，扶風公。前趙主劉曜取秦州，弋仲送質子請降，曜拜弋仲平西將軍，封平襄公，居之隴上。後趙滅前趙，徙氐羌十五萬落於司，——今河南——冀州，——今河北——以弋仲爲六夷左都督。石勒卒後，石虎攝政，徙秦雍豪傑於關東，以弋仲爲西羌大都督，封襄平縣公，居清河。——郡名——治所在今直隸大名道清河縣——冉閔之亂，弋仲起兵討之，後趙主石祗拜弋仲右丞相，加殊禮。弋仲陰有保據關右之志，遣其子襄擊蒲洪，爲洪所敗；會後趙主祗爲部將劉顯所弑，石氏盡滅，弋仲乃遣使請降於晉，朝廷拜弋仲車騎大將軍，六夷大都督，穆帝永和八年——西歷紀元三五二年——卒，子襄代領其衆。

襄少有高名，雄武冠世，好學，善談論，受父遺命，率衆南歸晉，詔處之譙城。——今安徽淮泗道亳縣——襄以前燕前秦方強，北方無隙可乘，乃移屯歷陽，——



郡名 治所在今安徽安慶道和縣——夾淮廣興屯田，訓勵將士以爲後圖。是時朝廷以殷浩爲中軍將軍，揚州刺史，當國；嫉襄之強，遷之蠡臺。——今河南開封道商邱縣——次年，遣兵襲之，襄擊敗浩兵，復渡淮，屯盱眙；——今安徽淮泗道盱眙縣——招掠流民，衆至七萬，分置守宰，勸課農桑，所部多勸北歸，乃移據許昌。——今河南開封道許昌縣——朝廷以桓溫爲大將，督諸軍討襄，破其兵於伊水；——在今河南洛陽城西南——襄北走，據襄陵，——今山西河東道襄陵縣——尋移屯黃落，——今陝西關中道同官縣之黃堡鎮——將窺長安，前秦遣兵擊斬襄，弟萇以衆降前秦。

前秦王苻堅以萇爲將軍，屢立戰功，肥水敗後，前燕第三代君主儁之子泓起兵畧關中，前秦王堅以皇子鉅鹿公叡爲大將，率師拒之，以萇爲叡司馬。叡粗猛輕敵，欲馳兵邀擊泓，萇諫，不聽，爲泓所敗，被殺。萇遣長史詣堅謝罪，堅怒殺之；萇懼，奔渭北馬牧，——牧馬之地——糾煽羌豪，徙屯北地，——今涇原道——自立爲秦王，史書稱之爲後秦。（註三十六）西燕主慕容冲攻長安，秦王堅出奔五將山，萇遣兵執堅以歸，弑之。冲入長安，課農築室，爲久居計，鮮卑人思東歸

，乃弑冲，棄長安而東；萇乘虛入長安，稱皇帝，於是現今陝西中部北部皆入於後秦。前秦宗室苻登取隴西，稱皇帝，與後秦血戰八年，卒爲後秦所敗，被殺，於是現今甘肅東部中部亦入於後秦。（註三十七）晉孝武帝太元十九年，——西歷紀元三九四年——萇卒，子興立，乘東晉有內亂，——王恭殷仲堪桓玄之亂——侵畧河南諸郡，安帝隆安三年，——三九九年——陷洛陽，於是現今河南西部亦入於後秦。四年，——四〇〇年——破西秦兵，降其王乞伏乾歸；五年，——四〇一年——破後涼兵，降其王呂隆；甘肅西境之漢族首領西涼公李暠，鮮卑酋長南涼王秃髮利鹿孤，匈奴酋長北涼王沮渠蒙遜皆遣使人貢，於是後秦之勢力範圍，擴張至現在甘肅西部。（註二十八）興在位久，崇拜佛法，以龜茲高僧鳩摩羅什爲國師，奉之如神；命鳩摩羅什翻譯西域經論，大營塔寺，沙門坐禪者常以千數，由是州郡化之，事佛者十室而九，文化大進，武力漸衰。晉安帝義熙三年，——西歷紀元四〇七年——其將赫連勃勃叛，畧取現在陝西榆林道，自稱大夏天王；五年，——四〇九年——乞伏乾歸叛，復據現在甘肅蘭山道，仍稱秦王，於是後秦疆宇日蹙。興太子泓孝友寬和

，喜文學，善談詠，而懦弱多病；其弟弼有寵，興以爲尙書令，弼傾身結納朝士，收采名勢，以傾東宮，國人惡之。義熙十二年，——四一六年——興疾篤，弼與其黨作亂，伏誅；興卒，泓立，晉太尉劉裕乘機大舉兵伐之，以王猛之孫鎮惡爲前鋒，自淮淝——淮水及淝水——向許洛，——許昌與洛陽——攻秦之正面，別將沈田子將偏師趨武關，——在今陝西關中道商縣東——牽掣秦之側面。鎮惡連破秦兵，取洛陽，潼關，遂入長安，泓出降，後秦亡，於是陝西爲晉所恢復。（註三十九）劉裕班師，留其十二歲之次子義真與諸將守關中，夏王勃勃乘虛襲陷長安，於是陝西入於夏。勃勃卒後，子昌卽位，爲後魏所攻，西奔上邽，於是陝西入於後魏。昌旋爲魏所擒，弟定西走南安，旋爲吐谷渾所滅，於是陝甘境內之氐羌民族皆在鮮卑民族勢力範圍之下，被同化於漢族。

## 第五節 巴氏之復活及其同化

巴人自戰國時羈縻於楚，後滅於秦，秦以其地爲黔中郡，薄賦其民，口出錢四十，巴人謂賦爲賚，因以名其民族。東漢末年，張魯據漢中，賓人李氏自巴西

宕渠——縣名 故城在今四川東川道渠縣東北——往依之，李氏之先，廩君之苗裔也，曹操克漢中，李氏將五百餘家歸之，拜爲將軍，遷之略陽，號曰巴氏。其孫輔，特，庠，流，驤皆有材武，善騎射，性任俠，州黨多附之。晉惠帝元康六年，——西歷紀元二九六年——秦雍氏羗齊萬年等反，關中荐饑，畧陽——今甘肅渭川道北部——天水——今渭川道中部——等六郡流民移入漢川者數萬家，道路有疾病窮乏者，特兄弟賑救之，由是得衆心。流民至漢中，上書求寄食巴，蜀，朝議遣侍御史李蕊持節慰勞，且監察之，不令入劍閣。蕊受流民賂，表言「流民十萬餘口，非漢中一郡所能賑贍，蜀有倉儲，宜令就食」，從之；由是散在梁益，不可禁止。

益州刺史趙廞見晉室衰亂，陰有據蜀之志，傾倉廩，賑流民，以收衆心；以李特兄弟材武，其黨類皆巴西人，與廞同郡，厚遇之，以爲爪牙。永康元年，——三〇〇年——據成都反，李庠以衆四千人歸之，庠驍勇得衆心，廞嫉而殺之。次年，特襲殺廞，朝廷以羅尚爲益州刺史，符下秦，雍二州，召還流民入蜀者，州郡逼遣，人人愁怨，相率歸特；特遂據廣漢——今四川西川道廣漢縣——爲據根地，進

攻成都，屢破尙兵；與蜀民約法三章，蜀民大悅，遂取少城——成都舊有二城相連，東曰太城，西曰少城，太城西壁即少城東垣。晉時益州刺史治太城，成都太守治少城——與尙相持。蜀民相聚爲塢者，皆送款於特，特分流民於諸塢就食，尙乘其勢分，襲破其兵，斬特及輔，弟流代領其衆，徙據郫城。——今四川西川道郫縣——流卒，特子雄代領其衆，遂破成都，盡有益州之地；永興元年，——三〇四年——自稱成都王，旋稱帝，國號成。愍帝建興元年，——三一三年——仇池將楊難敵襲陷梁州，——今陝西漢中道——州人張咸起兵逐難敵，以州降成，於是現在陝西南部及四川全省皆爲成有。雄虛己好賢，隨才授任，刑政寬簡，獄無滯囚，輕徭薄賦，百姓稱便；是時天下大亂，而蜀獨無事，年穀屢熟，境內小康。

雄以兄蕩之子班爲太子，晉成帝咸和九年，——三三九年——雄卒，班立，雄子越弒班，立弟期。期驕虐，多所誅殺，大臣多不自安；李驥之子漢王壽素貴重，有威名，尤爲期所嫉；是時壽爲梁州刺史，屯涪，——今四川東川道涪陵縣——咸康四年，——三三八年——舉兵襲成都，弒期而自立，改國號漢。盡殺雄諸子，以刑殺

御下；人有小過，輒殺之以立威；又大修宮室，民疲於役，思亂者衆。晉康帝建元元年，——三四三年——壽卒，子勢立，驕淫不恤國政，信任左右，讒諂並進，刑罰苛濫，中外離心。晉穆帝永和二年，——三四六年——荊州刺史桓溫舉兵伐之，破其兵於笮橋，——在今成都縣城西四里——勢出降，成亡，巴氏遺民完全同化於漢族。（註四十）

### 歸結

以上所舉：匈奴雜居地，大體在現在綏遠，山西，陝西及甘肅北部；烏桓雜居地，大體在現在熱河，奉天；鮮卑雜居地，初在今熱河，察哈爾，奉天，京兆，直隸，山西，甘肅西部與青海，後則徧於黃河流域全境；氐，羌雜居地，大體在陝西，甘肅及四川；巴氏雜居地，在陝甘南部與四川中部北部；代表漢族之南朝，奔避揚子江流域，憑藉現在江蘇，安徽，浙江，江西，湖北，湖南等省爲根據地，北抗五胡，南撫蠻獠；其結果則舊日苗人巢穴之揚子江中流下流流域，化爲漢族文化之中心點，其勢力範圍擴張至西江，閩江流域，現今廣東，廣西，福

建等省內，漢族戶口驟然增加，文化亦同時進步。及隋室勃興，南北復歸於一統，滿蒙混血族之烏桓，鮮卑，蒙滿混血族之匈奴，藏族之氐，羌，藏苗混血族之巴氏，皆統一於隋室勢力範圍之下，化爲漢族新分子；於是自秦漢以來，安富尊榮四百餘年，逐漸老大腐敗之漢族，經過五胡十六國殘殺屠掠之大劫，加入許多新分子而復活，隋唐時代的文治武功，乃蒸蒸日上，非復秦漢時代之舊觀矣。

以上所舉，爲北狄遺族之匈奴烏桓鮮卑，西戎遺族之氐羌，南蠻遺族之巴氏與漢族混合事蹟，只有東夷一族，自春秋以後，久已不見經傳，而其舊分布地特別好出偉人，若春秋時代之管子爲潁上——今安徽淮泗道潁上縣——人，孔子爲魯人，孟子爲鄒——今山東濟寧道鄒縣——人，老子爲楚之苦縣——今河南開封道淮陽縣——人，莊子爲蒙——今濟寧道蒙陰縣——人，墨子爲魯人或宋人，皆第一流學者；漢高帝與其佐命蕭何，曹參皆沛豐——今江蘇徐海道豐縣沛縣——人，魏武帝曹操爲沛國譙——今淮泗道亳縣——人，蜀漢丞相諸葛亮爲琅邪陽都——今山東半島南部古縣名——人，東晉佐命王導爲琅邪——今濟甯道臨沂縣——人，東晉宰相謝安爲陳國陽夏——今

開封道太康縣——人，前秦宰相王猛爲北海劇——今山東膠東道境內古縣名——人，宋武帝劉裕爲彭城縣綏里——今徐海道銅山縣——人，皆第一流政治家；西楚霸王項籍爲下相——今徐海道宿遷縣——今漢高帝大將韓信爲淮陰——今江蘇淮陽道淮陰縣——人，彭越爲昌邑——今濟寧道金鄉縣——人，英布爲六——今淮泗道六安縣——人，東晉大將桓溫爲譙國龍亢——縣名故城在今安徽懷遠縣西七十里——人，謝玄爲陳國陽夏人，皆第一流軍人；其降生地皆在今淮水流域與山東半島，不謂其受東夷混合之影響不可得也。至隋唐勃興，西戎南蠻北狄苗裔，復與漢族混合，於是漢族第二次之大帝國復成立矣。

註一、看東洋史第二編九七至一百頁北匈奴之西遷與西羅馬帝國之顛覆

註二、看東洋史第二編九三至九六頁南匈奴之南遷與西晉之淪滅

註三、看中國史第二編第二期第四章賈后之亂與八王之亂

註四、看中國史第二編第二期第五章第一節前趙之勃興與西晉之淪滅

註五、看同

第二節兩趙之衝突與前趙之滅亡

註六、看同

第三節二，後趙之衰亂



第四章 註

六十六

註七、看同

第八章第二節匈奴劉氏之興亡

註八、看同

第五節夏之建國

註九、看同

第八節西秦與夏之衰亡

註十、看同

第七章第四節南涼西涼之建國

註十一、看同

第八章第十一節北涼之衰亡

註十二、看東洋史第二編八七至九〇頁東胡民族之復活

註十三、看東洋史第二編九〇至九一頁鮮卑之猖獗

註十四、看中國史第二編第二期第五章第三節前燕之勃興

註十五、看東洋史第二編一三八頁吐谷渾之建國

註十六、看中國史第二編第二期第五章第四節三，前燕之衰亡

註十七、看同

第五節二，後燕之建國

註十八、看同

三，西燕之建國

註十九、看同

五，西燕之破滅

註二十、看同

第四節六，代之興亡

註二十一、看中國史第二編第二期第八章第一節拓跋珪之復國

註二十二、看同

第三節後燕之衰亡與北燕之建國

註二十三、看同

第九節北燕之衰亡

註二十四、看同

第七章第一節南燕之興亡

註二十五、看東洋史第二編一八三頁吐谷渾之內屬一八五頁吐谷渾之淪滅

註二十六、看唐書一四三卷沙陀傳

註二十七、看中國史第二編第二期第八章第六節西秦之建國第八節西秦與夏之衰亡

註二十八、看同

第七章第六節南涼北涼西涼之建國

註二十九、看同

第八章第四節南涼之衰亡

註三十、看同

第九章第一節宋魏之衝突第三節四，淮北四州之淪沒第六節齊魏之衝突

突第八節梁魏之衝突第十一章第四節江陵之陷

註三十一、看中國史第二編第二期第九章第五節魏孝文帝之變法第十章第一節後魏衰亡之原因

註三十二、看東洋史第二編一〇一至一〇四頁氏羌二族勢力之膨脹

註三十三、看中國史第二編第二期第五章第四節四，仇池楊氏之興亡

註三十四、看同

第四節一，前秦之建國第五節前秦之衰亡

註三十五、看同

第七章第四節後涼之興亡

第四章註

註三十六、看同

註三十七、看同

註三十八、看同

註三十九、看同

註四十、看同

第五章第五節四、後秦之建國

五、前秦之衰亡

第七章第四節後秦之勢力擴張

第五節後秦之衰亡

第六章第六節成李氏之興亡

## 第五章 漢族第二次休養時代 隋唐

### 小引

漢族第一次蛻化，在春秋戰國時代，東夷，西戎，南蠻，北狄從四面侵入，競以武力陵虐漢族；前後擾攘四百餘年，卒被漢族文化所征服；大多數之蠻夷戎狄，皆棄其固有之國民性，相率同化於漢族；於是自西周末年以來，逐漸老大腐化之單純漢族，至是因異族結婚之結果，新產出一種少年混血漢族，造成秦漢兩朝之漢族大帝國，與歐洲之羅馬帝國東西對峙，爲世界中古史初期無上光榮之大國。漢族文化之盛，武力之雄，至西漢中葉達於極點，自此以後，經過二百餘年，逐漸老大腐化，黃巾之亂，董卓之亂，涼州諸將之亂相繼而起，州牧郡守各據地自王；天下分崩離析者百餘年，一變而爲三國，再變而爲西晉；西晉號稱一統，然宗室諸王兵權太重，地方政府對於中央政府，離心力之強遠在向心力以上；賈后之亂，八王之亂相繼而起，宗室互相殘殺，五胡乘勢侵入中國，黃河流域化爲異族屠掠之場，流血之慘，爲古來歷史上所僅見。自此以後，又經過二百餘

年，漢族遺民經過許多忍辱負重，努力奮鬥之結果，與匈奴，鮮卑，氐，羌各族遺民，血統逐漸混合，釀成一種新民族，漢族固有之文化與異族固有之武力結合爲一，以漢族爲父系，鮮卑人爲母系，造成隋唐兩朝之漢族大帝國。——隋文帝楊堅爲東漢太尉楊震之後，唐高祖李淵爲西涼武昭王李暠七世孫，皆漢族也。隋文帝文獻皇后獨孤氏，唐高祖之母獨孤氏，爲周大司馬河內公獨孤信之女；鮮卑人也。高祖太穆皇后竇氏，父爲隋定州總管神武公竇毅，漢族也；母爲周武帝姊襄陽長公主，鮮卑人也。太宗文德皇后長孫氏，隋左驍衛將軍晟之女，其先爲後魏太祖文帝長子沙漠雄，後改姓長孫氏；太宗朝宰相長孫無忌爲文德皇后之兄，高士廉爲北齊清河王岳之孫，字文士及爲隋大將軍宇文述之子，本姓破野頭；高宗朝宰相于志寧爲周太師燕國公謹之曾孫，中宗宰相豆盧欽望，爲後周大司寇楚國公寧之玄孫，本姓慕容氏，爲前燕支庶；穆宗宰相元稹，爲後魏昭成帝什翼犍十五世孫，皆鮮卑人也。——漢族文化之盛，武力之雄，至唐時發達達於極點，西與印度交通頻繁，產生出一種儒佛混合之新文化，東與高麗，百濟，北與突厥，鐵

勒，回紇，奚，契丹，西與沙陀，黨項，吐蕃交通頻繁，加入許多民族新分子，產生出無量數之新漢族，於是漢族之勢驟張，三國兩晉南北朝時代第二次蛻化之成績，至是始告圓滿無缺矣。茲述其事蹟如左：

### 第一節 高麗百濟血統之加入

通古斯民族之發祥地，在今烏蘇里江，松花江流域，最古之部落稱為肅慎氏，秦漢時代，分股南下，散布於現在奉天北部，吉林西部，建國號曰扶餘；包有奉天洮昌道，吉林吉長道一帶，爲農業之國；境內多平原，土宜五穀，文化相當發達。西漢末年，其王子鄒牟得罪於本國，南奔卒本，——今佟家江流域——畧取現在奉天東邊道東北部，建國號曰高麗。（註二）——本名高勾驪，畧稱之曰高麗。漢成帝鴻嘉元年，——西歷紀元前二〇年——鄒牟殂，子類利立，是爲瑠璃明王，異母弟沸流，溫祚與之不協，南奔負兒嶽；——今名三角山，在朝鮮京城之北，——沸流擇居於彌鄒忽，——今朝鮮京畿道仁川——溫祚擇居於慰禮城，——當在今京畿道漢江北岸——相度地勢，招集戶口，開闢草萊；朝鮮半島西南部箕氏之馬韓王，割

東北境百里之地以封之。已而慰禮城附近地利日闢，人口日繁，彌鄒忽卑濕，不宜於居住，沸流鬱鬱憂憤而卒，其臣民皆歸慰禮城，溫祚之勢日盛，乃建國號曰百濟。（註二）

自此以後，高麗在朝鮮半島北部，百濟在半島西南部，逐漸發展勢力，高麗乘西晉末年中國內部有五胡十六國之亂，盡取遼河以東地，與前燕，後燕，北燕等國構兵，互有勝負；百濟亦滅馬韓之箕氏，東與朝鮮半島東南部韓民族所創立之新羅，北與高麗競爭，三國各用合縱連橫手段，互相傾軋，對內取抑強扶弱主義，合兩弱國以抗一強國，強弱之形勢有時變更，分合之情形亦隨之而變；對外取遠交近攻政策，百濟通好於中國南朝以威嚇高麗，高麗亦通好於中國北朝以抵制百濟，新羅聯絡高麗以壓迫百濟，百濟亦聯絡日本以抵抗新羅，雙方彼此互相利用，互相牽掣，極縱橫捭闔之能事。（註三）及其晚年，高麗與隋衝突，隋文帝開皇十八年，——西歷紀元五九八年——楊帝大業七年，——六一一年——九年，——六一三年——曾三次大舉兵伐高麗，皆無功而還，於是高麗日益跋扈。（註四）

已而隋亡唐興，中華大帝國復成立，三國皆懼，先後遣使入朝，受封冊。是時高麗東部大人泉蓋蘇文作亂，弑其王建武，而立王弟之子藏，是爲寶藏王；自爲莫離支，——總文武二柄，猶中國之吏兵二部尙書。——專國政；與百濟聯合，南北夾攻新羅，新羅孤立無助，遣使請救於唐，太宗遣使喻高麗罷兵，蓋蘇文不奉詔。貞觀十八年，——六四四年——太宗自將伐高麗，無功而還，新羅出兵攻高麗南境以應中國，百濟亦出兵攻新羅西境以救高麗，二國狼狽相倚，跋扈滋甚。（註五）高宗永徽六年，——六五五年——高麗百濟連兵侵新羅北境，破三十五城，新羅請救於唐，顯慶五年，——六六〇年——朝廷以蘇定方爲大將，率師十萬，自現在山東成山角渡海，攻百濟西部，新羅亦出兵攻百濟東方，百濟力竭請降，詔分其地爲五都督府，擢其酋長爲都督，刺史；遷其王族於長安，（註六）徙其豪傑於徐，——今江蘇徐海道西部——兗，今山東濟寧道中部——營——今熱河東南部——等州，（註七）儀鳳元年，——六七六年——復徙置於遼東境內之建安故城，於是百濟遺民遂雜居中國，與漢族同化矣。



百濟既亡，朝廷遂乘勢經畧高麗，龍朔元年，——六六一年——以任雅相等爲大將，率三十五軍，水陸分道伐高麗，連破其兵，遂圍平壤，——高麗都城，在今朝鮮黃海道。——會雅相卒於軍，平壤久不下，諸軍乃引還。

已而泉蓋蘇文卒，其長子男生專國政，與其弟男建，男產爭權，走降中國。

乾封元年，——六六六年——朝廷以李勣爲大將，使男生領嚮導，統諸軍伐高麗；大破其兵，遂圍平壤，高麗王藏降，詔分其地爲九都督府，四十二州，百縣，置安東都護府於平壤以統之，擢其酋帥有功者爲都督，刺史，縣令；遷其王族於長安，（註八）徙其遺民三萬八千三百戶於江淮之南及山南，——今湖北襄陽道，陝西漢

中道。——京西——今陝西長安以西——諸州空曠之地，留其貧乏者使守安東；（註九）

儀鳳二年，——六七七年——立高藏爲朝鮮王，遣歸遼東，安輯高麗餘衆，高麗人先在諸州者，皆遣與俱歸；（註十）藏至遼東，謀叛，召還，徙邛州——今四川建昌道邛崃縣——而死；分徙其遺民於河南，隴右諸州。（註十一）於是多數高麗遺民雜居中國內地，仕於朝廷多顯官，若中宗時代之黑齒常之係百濟西部人，玄宗時代之高

仙芝，王思禮，係高麗人，皆爲有唐初年名將；（註十二）淄青藩鎮李正己，納，師古，師道祖孫父子，亦高麗人，爲有唐中葉以後叛將。

## 第二節 突厥血統之加入

突厥民族之發祥地，在阿爾泰山麓，地處亞洲北部中央，爲現在中俄分界地。地勢高寒，不適於農耕，土人以遊牧爲業，爲天然現象所驅，常欲逐漸東下；緣阿爾泰山東麓，移至現在外蒙古西部，爲匈奴勢力所阻碍，不能自由向東方發展；乃分爲二股：一股東南下，移至中國甘肅河西，占領現在甘涼道，安肅道及阿拉善王旗等地，分爲二大部落，一曰大月氏，一曰烏孫。（註十三）一股東北下，移至現在俄領西伯利亞中部，散住於伊爾庫次克省，後貝加爾省等地，稱爲丁零。（註十四）匈奴全盛時代，用武力向四圍發展，丁零受其壓迫，爲所羈縻。大月氏，烏孫，相繼戰敗，大月氏移到現在阿母河流域，征服希臘人建立之大夏與印度西北部，建立極大王國；輸入希臘，印度文化，開闢自己草昧，一時文化程度甚高，武力甚強，在亞洲史上所占之位置，亞於波斯印度。（註十五）烏孫移到

現在伊犁河流域，占領天山北路及俄領七河省，與西漢聯合，東西出兵夾攻匈奴；前後相持數十年，卒擊敗匈奴，使之稱臣，納貢，入朝於漢。（註十六）東晉中葉以後，大月氏衰微，其同族之嚙噠，復崛起於天山之東，南向占領阿母河流域，西壓波斯，東略印度，其武力之強，與大月氏相伯仲。（註十七）南北朝末年，嚙噠衰微，其同族突厥，復勃興於阿爾泰山之南，東滅鮮卑人所建立之柔然，占領外蒙古；西併天山南北路及錫爾河流域，建立極大之遊牧帝國；（註十八）南向侵畧中國，北朝之北周，北齊，皆汲汲以買其歡心爲必要。隋室建國日淺，人望未孚，對於突厥始終取羈縻政策。唐室勃興，始取積極政策，太宗，高宗二代，先後滅東西兩突厥，併吞其領土，融合其民族，於是漢民族中始有大多數突厥民族血統加入，人種上又一進化矣。茲述其事蹟如左：

突厥本西方小國，姓阿史那氏，世居金山——今阿爾泰山——之陽，爲柔然鐵工。梁武帝大同年間，——西歷紀元五三五至五四五——酋長土門在位，有勇畧，南破天山東麓同族之高車，併其部落五萬餘衆，國勢大張。求婚於柔然，柔然頭兵可

汗詈之，土門怒，自立爲伊利可汗，——北方民族總首領之名稱，等於中國之皇帝，匈奴之單于，——擊柔然，大破之，殺頭兵，滅其國，盡取內外蒙古。自此以後，累代多英主，南向侵略中國，北周北齊對峙時代，雙方皆厚賂之以買其歡心。隋室統一中國，用遠交近攻策，東聯現在熱河特區境內東胡遺民之奚，契丹，西結中亞境內突厥別部之達頭可汗，使雙方牽掣突厥，突厥沙鉢略可汗勢孤，乃請和親，上表稱臣入貢。沙鉢略殂後，其子都藍可汗與其弟子突利可汗對立，隋室縱反間計，離間都藍與突利；突利爲都藍所敗，請降於隋，隋立突利爲啓民可汗，居之大利城。——在今綏遠特區歸化城西——都藍尋爲其下所弑，餘衆皆降於啓民，啓民北歸外蒙古境內之可汗庭，事隋甚謹。

啓民殂後，子始畢可汗在位，適值隋亡唐興，中國北部之群雄，若馬邑——今山西雁門道——校尉劉武周，朔方——今綏遠特區西部——郎將梁師都，榆林——今陝西榆林道——流人郭子和等，各據郡起兵，爭引突厥爲援，競稱臣於突厥以媚之。唐高祖起兵太原，亦遣使稱臣借兵，賂遺甚厚；突厥恃功驕倨，每遣使至長安，多

暴橫。始畢殂後，弟頡利可汗，子突利可汗並立，屢助劉武周，梁師都及河北群雄夏王竇建德之故將劉黑闥等侵畧北邊，唐室患之。唐太宗縱反間計離間二可汗，突利歸心於唐；頡利怒，陵虐突利，突利奔唐。貞觀四年，——西歷紀元六三〇年——太宗乘突厥內亂，以李靖爲大將。統諸軍擊滅之，執頡利，分其地爲六州，左置定襄，右置雲中二都督府以統之，分突利故地，置順，祐，化，長四都督府，（註十九）以突利爲順州都督，頡利爲右衛大將軍，啓民可汗弟蘇尼失爲北寧州都督，封懷德郡王；頡利族人思摩爲化州都督，封懷化郡王，尋進拜右武侯大將軍，賜姓李，使統頡利故部；其餘酋長，拜將軍，中郎將者五百人，奉朝請者百餘人，因而入居長安者近萬家，（註二十）於是突厥遺民多數被同化於漢族。蘇尼失子阿史那忠，處羅可汗次子阿史那社爾，別部酋長執失思力與西突厥特勤史大奈等，皆仕於唐，有戰功，爲有唐初年名將；李光弼副將白元光，亦突厥人，爲肅宗靈武中興名將。（註二十一）

### 第三節 鐵勒血統之加入

鐵勒者，亦突厥民族，散居漠北，分薛延陀，回紇，都播，骨利幹，多濫葛，同羅，僕固，拔野古，思結，渾，斛薛，奚結，阿跌，契苾，白霫等十五部。舊臣屬突厥，頡利政衰，薛延陀部酋長夷男率其徒擊頡利，大破之，衆共推夷男爲主；朝廷方圖突厥，用遠交近攻策，遣間使立爲眞珠毗伽可汗。突厥亡後，其部落多北附薛延陀，夷男建庭於都尉犍山，回紇以下諸部皆隸之。唐太宗貞觀十九年，——西歷紀元六四五年——夷男殂，子多彌可汗立，猜褊好殺，國人不附。回紇部酋長吐迷度率諸部叛，擊殺多彌可汗，餘衆西走，貞觀二十一年，——西歷紀元六四七年——朝廷遣李世勣率師擊滅之。回紇以下諸部相繼來降，請吏奉貢，願爲內臣；詔以回紇爲瀚海都督府，僕固爲金微都督府，多濫葛爲燕然都督府，拔野古爲幽陵都督府，同羅爲龜林都督府，思結爲廬山都督府；渾爲臯蘭州，斛薛爲高闕州，奚結爲雞鹿州，阿跌爲雞田州，契苾爲榆溪州，思結別部爲蹕林州，白霫爲賓顏州；拜其酋長爲都督，刺史，置燕然都護府於漠北以統之。（註二十）於是北荒悉平，諸部酋長多入居中國，仕朝廷爲顯宦，若契苾氏之何力，明父

子爲有唐初年名將；僕固氏之懷恩，瑒父子，渾氏之釋之，爲肅宗靈武中興名將；釋之之子瑒爲德宗奉天定難功臣，阿跌氏之光進，光顏兄弟，並賜姓李，爲憲宗元和功臣；回紇阿布思之族廷湊，爲王武俊養子，穆宗時據成德叛，子元逵，孫紹鼎，紹懿，曾孫景崇，玄孫鎔相繼據鎮州——今正定縣——者百年，後爲部將張文禮所殺；李茂勳，可舉父子，亦回紇阿布思族，唐末，竊據幽州，稱盧龍節度使，後爲沙陀李克用所滅；皆其中之錚錚佼佼者。（註二十三）其後回紇統一漠北，安史之亂，——在唐玄宗天寶末年——兩次入援中國皆有功，肅宗以皇女寧國公主妻其葛勒可汗，穆宗又以皇妹太和公主妻其崇德可汗，待遇甚優，因而回紇人移入中國內地者不少。武宗會昌中，——西歷紀元八四一至八四六——回紇爲黠戛斯——國名，在今俄領西伯利亞伊爾庫次克省。——所破滅，遺民降幽州者前後萬餘人，皆散隸各道，於是回紇人遂徧布於中國內地矣。（註二十四）

#### 第四節 沙陀血統之加入

沙陀者，亦突厥民族，舊名處月，爲西突厥別部。西突厥強盛時代，處月與

其別部處密，分據伊犁河流域；其後西突厥衰亂，處月徙居現在新疆迪化道東北  
部沙雷努雷山——塔爾巴哈台山脈之分支，在哈密縣北部。——之南，巴里坤湖——屬  
鎮西縣——之東，其地有大磧，名沙陀，因號沙陀突厥。西突厥亡後，處月降唐，  
高宗永徽年間，——西歷紀元六五〇至六五五——卽其地置金滿，沙陀二州，皆領都  
督。龍朔中，——六六一至六六三——其酋長朱邪金山，從薛仁貴討鐵勒有功，授墨  
離軍討擊使，累封張掖郡公。金山卒，子輔國嗣，避吐蕃禍，徙部北庭，——今新  
疆迪化縣——累封永壽郡王。輔國卒，子骨咄支嗣，從肅宗討安祿山有功，拜特進  
，驍衛上將軍。骨咄支卒，子盡忠嗣，累遷金吾衛大將軍，封酒泉縣公。

是時河隴淪沒，北庭，西州——今迪化道土魯番縣——閉不通，朝奏使皆道出回  
紇。回紇貪婪，沙陀苦其暴斂，德宗貞元中，——西歷紀元七八五至八〇四——遂附  
吐蕃，與共寇北庭，陷之；吐蕃徙其部甘州，以盡忠爲軍大論。——吐蕃官名——  
沙陀勁勇冠諸胡，吐蕃每戰，以爲前鋒；久之，回紇攻吐蕃，取涼州，吐蕃疑盡  
忠持兩端，欲徙沙陀於河外，盡忠與其子執宜謀復歸唐。憲宗元和三年，——八



○八年——帥部落三萬而東，吐蕃兵追之，自洮水轉戰至石門，——關名在今甘肅涇原道境內——凡數百合，死者大半，盡忠沒於陣，執宜率餘衆詣靈州降。——今甘肅寧夏道靈武縣——節度使范希朝置之鹽州，——故城在今甘肅寧夏道鹽池縣北——爲市牛羊，廣其畜牧，善撫之。詔置陰山府，以執宜爲兵馬使，執宜乃保神武川之黃花堆，——一名黃瓜堆在今山西雁門道山陰縣北——更號陰山北沙陀。文宗太和中，——八二七至八三五——徙治雲朔塞下，——今雁門道長城外——授執宜陰山府都督。執宜生赤心，以討龐勛功，授大同軍節度使，賜姓李，名國昌。國昌生克用，以討黃巢功，授河東節度使，封晉王。克用生存勗，遂滅朱梁，盡取黃河流域，自立爲皇帝，國號唐，史稱後唐，是爲突厥民族君臨中國之始。（註二十五）其後後晉石敬瑭，後漢劉知遠，北漢劉崇，皆爲其同族，（註二十六）於是沙陀人之分布地遂徧於黃河流域矣。

## 第五節 黨項血統之加入

黨項亦圖伯特族，本西羌別種，其字音爲羌之音轉，其散布地在現在四川西

川道西北邊外，當青海之南，山谷崎嶇，以姓別爲部，一姓又分爲數小部落，大者萬騎，小數千，有細封氏，費聽氏，往利氏，頗超氏，野辭氏，房當氏，米禽氏，拓拔氏，而拓拔最強。舊臣屬吐谷渾，唐太宗貞觀八年，——西歷紀元六三四年——西海道行軍大總管李靖征服吐谷渾，黨項亦同時內屬，朝廷分其地爲府州，即首領拜都督，刺史，授拓拔氏酋長赤辭爲西戎州都督，賜姓李。其後吐蕃強盛，拓拔氏漸爲所逼，遂請內徙，詔移其部落於慶州，——今甘肅涇原道慶陽縣——置靜邊等州以處之，是爲拓拔氏雜居甘肅之始。其後時叛時服，朝廷苦之；郭子儀都統朔方，邵寧，鄜坊，奏請徙靜邊州都督，夏州樂容等六府黨項於銀州——今陝西榆林道米脂縣——之北，夏州——今橫山縣——之東，召其首領拓拔朝光等五刺史入朝，厚賜遣還，是爲拓拔氏移住陝西之始。其後析居夏州者號平夏部，黃巢之亂，——在僖宗廣明元年至中和四年，西歷紀元八八〇至八八四年。——其酋長拓拔思恭起兵勤王，助都統鄭畋討賊有功，授定難節度使，統夏，綏，——今綏德縣——銀，宥，——在今鄂爾多斯右翼前旗，元和十五年，移治靖邊縣——靜——今靖邊縣——

五州，封夏國公，賜姓李。思恭卒，弟思諫，孫彝昌相繼嗣職，後梁太祖開平四年，一八九〇年——彝昌爲其下所殺，將士立其族父仁福。仁福卒後，子彝超，彝興，孫克睿，曾孫繼筠相繼嗣職；適值宋室勃興，繼筠稱臣，入貢，修好於宋，助宋太宗滅占領現在山西中部沙陀劉氏創立之北漢有功，朝廷優加賞賚。繼筠卒，弟繼捧襲職，宋太宗太平興國七年，——九八二年——舉族入朝納土，族弟繼遷不從，叛走地斤澤，——在橫山縣東北——宋廷剿撫失機，遂令繼遷坐大；至其孫元昊，遂占領現在綏遠特區與陝甘北部，建都寧夏，稱大夏皇帝，與宋對峙二百餘年，時起衝突，侵畧陝甘中部，宋廷卒無如之何；至有元勃興，始統一於蒙古民族勢力範圍之下，復與中國合併。（註二十七）

## 第六節 吐蕃血統之加入

吐谷渾，黨項相繼內屬，唐室西境遂與吐蕃相接。吐蕃亦圖伯特族，本西羌屬，在吐谷渾西南，其根據地爲現在前藏都城拉薩。隋唐之交，其國寢強，併吞近傍各部落，統一現在前後藏。唐初，擊破吐谷渾及黨項，併吞現在青海與川邊

特區，創立藏族空前絕後一統之大帝國。貞觀十五年，——西歷紀元六四一年——請婚於唐，太宗以宗室女文成公主，妻其贊普——吐蕃君主之稱，猶中國之皇帝，匈奴之單于，突厥之可汗。——棄宗弄讚，復遣諸豪子弟留學中國，學習詩書；又請儒者典章疏，於是中國文化輸入西藏。（註二十八）高宗，武后，中宗，玄宗在位時代，——六五〇至七五五——吐蕃屢次發兵窺甘肅，新疆，朝廷派大將，統重兵，與之角逐於青海之東及天山之南，互有勝負，西方苦於兵役。武后聖曆二年，——中宗嗣聖十六年西歷紀元六九九年——吐蕃大將論贊婆率所部千餘人，論弓仁以所統七千帳來降，於是多數藏人歸化於中國。（註二十九）安史之亂，——七七五至七六三——朝廷盡調隴右，——今甘肅南部——河西，——今甘肅北部——安西，——今天山南路——北庭，——今天山北路——諸鎮之精兵東征，留兵單弱，吐蕃乘機蠶食河西隴右，盡取現在甘肅西寧，蘭山，渭川，甘涼，安肅五道全部與涇原道西部；復移兵南下，破四川西部諸州；（註三十）德宗貞元六年，——七九〇年——復陷安西北庭，取現在天山南北路；於是甘肅，新疆與四川西部皆為藏族雜居地。（註三十一）武宗時代

，——八四一至八四六——吐蕃內亂，諸部分裂，國勢衰微，宣宗大中三年，——八四九——吐蕃秦——今渭川道天水縣——原，今涇原道固原縣——安樂——在今寧夏道靈武縣境內——三州，木峽，石門，驛藏，制勝，石峽，六盤，蕭關等七關——皆在今涇原道境內——守將相繼來降，朝廷出兵接應；沙州——今安肅道安西縣——漢族張義潮陰結豪傑，逐吐蕃守將，發兵畧定其旁十州郡，盡復河西隴右，朝廷置歸義軍於沙州，統河隴十一州，以義潮爲節度使，鎮之；西川節度使遣兵取維州，——故城在今四川西川道理番縣西十里——恢復川西諸州縣；於是現在甘肅四川境內吐蕃遺民皆被同化於漢族。（註三十二）

北宋初年，尙有許多小部落，分據甘肅西南部；對於中國政府，稱臣，納貢，爲保護國，具半獨立之勢；李繼遷作亂，太宗曾任命西涼府——今武威縣——境內六谷都首領潘羅支爲大將，使之牽掣繼遷；李元昊反，仁宗又利用鄯州——今西寧道——境內邈川大首領唃廝囉武力，使之夾擊元昊，頗能効忠於中國。其後元昊陷西涼府，六谷部落爲所兼併；神宗時代，經畧使王韶復河，洮，岷，宕，疊等州，——俱在今蘭山道境內——邈川首領木征——唃廝囉玄孫——

納土，入朝，授榮州團練使，賜姓名趙思忠，於是甘肅境內藏族首領漸夷於庶姓。  
。（註三十三）有元勃興，滅金，滅夏，統一黃河流域；西與西藏交通，尊喇嘛教首領八思巴爲國師，崇拜其教；於是藏族與蒙族結合，中國境內之吐蕃遺民，在蒙古帝國勢力範圍之下，完全被同化於漢族矣。（註三十四）

### 第七節 奚血統之加入

西喇木倫，老哈木倫流域，爲東胡舊根據地，西漢初年，爲蒙古境內之遊牧帝國匈奴所破滅，其遺民分爲烏桓，鮮卑二大部落，羈縻於匈奴。東漢末年，烏桓爲曹操所滅，其遺民多徙居中國邊地，被同化於漢族。兩晉南北朝時代，鮮卑各部落多徙居中國內地，占領黃河流域，創立許多短命之帝國王國，與漢族南北對峙。後魏之衰，鮮卑威靈掃地，其遺民與漢族合體，建設隋唐二大帝國，爲政界主要分子；其舊根據地西喇木倫老哈木倫流域遺民，始終未移居中國，尙未與漢族同化者，在有唐初年，尙分二大部落：一曰奚，一曰契丹。

奚居烏桓舊地，元魏時，自號庫眞奚。隋時，始去庫眞，但曰奚。其地東北

接契丹，西接突厥，南臨白狼河，——今大凌河，發源熱河凌源縣之松嶺山脈，經奉天錦縣，入渤海。——北鄰靺鞨，——即白靺鞨，在今熱河北部西喇木倫河北。——大體在現在熱河中部西喇木倫老哈木倫流域，爲遊牧之國，分五部，每部各置一俟斤——官名——主之。唐太宗貞觀三年，——西歷紀元六二九年——始來朝，自此以後，至貞觀二十年，凡四次朝貢。二十一年，太宗伐高麗，奚從戰有功，二十二年，——六四八年——其酋長可度者請內屬，詔以其地爲饒樂——水名即西喇木倫河——都督府，授可度都督，封樓煩縣公，賜姓李；以阿會部爲弱水——元魏時名弱洛水，畧稱爲弱水，音轉而爲饒樂水。——州，處和部爲都黎州，奧失部爲洛瓊州，度稽部爲大魯州，元俟折部爲渴野州，各以其部長爲刺史，並隸饒樂都督府，而置東夷校尉於營州——今熱河朝陽縣——以統之。武后萬歲通天——六九六年——中，契丹酋長李盡忠，孫萬榮反，奚亦叛，與連兵。睿宗太極元年，——七一二年——幽州都督孫佺，將軍李洛楷，周以悌率兵擊奚，兵敗，佺以悌皆爲所虜。玄宗開元二年，——七一四年——其酋李大酺遣使謝罪請降，復授饒樂都督，封饒樂郡王，以宗室出女辛

氏爲固安公主，妻之。八年，——七二〇年——從營州都督許欽澹討契丹叛酋可突干，兵敗，戰死，弟魯蘇代領其衆；詔授都督，襲王，以盛安公主女韋氏爲東光公主，妻之。十八年，——七三〇年——可突干脅奚人叛降突厥，魯蘇不能制，奔榆關。——今山海關——二十年，——七三二年——河北副元帥信安王禕將兵伐契丹，奚酋李詩等率部落五千帳迎降，詔以其地爲歸義州，拜詩都督，徙其部落於幽州之傍，於是奚人始南徙。（註三十五）多數奚人雜居內地，仕於朝爲顯官，若德宗建忠功臣義武節度使張孝忠，本名阿勞，成德叛將李寶臣，惟岳父子，穆宗時魏博叛將史獻誠，其最著者也。（註三十六）天寶三載，——七四四年——安祿山兼范陽節度使，誘奚王李日越，殺之，俘其驍壯戍雲南，於是奚人始雜居中國西南部。自此以後，時常朝貢，終唐之世，爲東北藩臣；雖偶有侵寇，然大體平和時多，衝突時少。懿宗——八六〇至八七三——以後，契丹強盛，奚不能抗，爲所羈縻，契丹虐待奚人，奚人怨恨，其酋去諸引別部內附，保媯州——今口北道懷來縣——之北山，於是奚人始雜居口北道境內，分爲東西奚，東部附屬契丹，後隨遼人同被漢化，西部



附屬中國，唐末已全部被漢化矣。

### 第八節 契丹血統之加入

契丹居鮮卑舊地，東接高麗，西接奚，南接中國之營州，北接室韋，——今黑龍江上流流域唐代部落之總名——大體在現在遼河中流流域，——即熱河東北部，奉天洮昌道——爲遊牧之國。其君長姓大賀氏，勝兵數萬人，分八部，舊臣屬突厥，隋唐之交，始爲中國所羈縻。唐太宗貞觀二十一年，——六四七年——帝自將伐高麗，至營州，契丹酋長窟哥來朝，請內屬；二十二年，即其地置松漠都督府，授窟哥都督，封無極男，賜姓李；以其屬下達稽部爲峭落州，紇便部爲彈汗州，獨活部爲無逢州，芬間部爲羽陵州，突便部爲日連州，芮奚部爲徒河州，墜斤部爲萬丹州，伏部爲匹黎，赤山二州，各以其部長爲諸州刺史，並隸松漠都督府；置東夷校尉於營州，兼轄松漠饒樂二都督府，使漢官爲校尉以統之。武后萬歲通天元年，——六九六年——營州都督趙文翽陵辱契丹，窟哥之孫李盡忠時爲松漠都督，怨文翽，與其別部酋長歸誠州刺史孫萬榮舉兵反，陷營州，盡忠自稱無上可汗，以

萬榮爲前鋒，分兵四畧，所向皆破；會盡忠卒，突厥默啜可汗乘契丹傾國南之侵隙，襲破松漠都督府，虜盡忠萬榮妻子，萬榮軍潰，爲其下所殺，於是契丹附於突厥。玄宗開元二年。——七十四年——盡忠從父弟失活見默啜政衰，復率衆來降，授都督，封松漠郡王，以東平王外孫楊元嗣女爲永樂公主，妻之；所統八部，各擢其酋長爲刺史。自此以後，時叛時服，朝廷取羈縻政策，輒以宗室出女妻其君主，授都督，封王爵，與之連和。（註三十七）武后時，其酋長李楷洛入朝，累官左羽林大將軍，封薊郡公。楷洛之子光弼事玄宗，以功荐擢至朔方節度副使；安史之亂，奉詔經畧河北，鎮撫河東，恢復河南，有大功，拜太尉，中書令，封臨淮王，爲肅宗靈武中興功臣之首，與郭子儀齊名。光弼之弟光進事肅宗，有戰功，掌禁兵；代宗時，出爲渭北邠寧節度使，封武威郡王。光弼之子彙有志操，廉介自持，憲宗時，授宿州刺史，遷涇原節度使，有惠政，卒贈工部尚書。自此以後，契丹李氏爲唐室世臣，與國家同休戚。（註三十八）成德藩鎮王武俊，士真，承宗，祖孫父子，安祿山部將孫孝哲，皆契丹人；安祿山及其部將李懷仙皆營州柳城——

今熱河凌源縣——胡，亦奚契丹同族人也。（註三十九）

此外若高宗朝之大將李謹行，任雅相，中宗朝之大將李多祚，德宗朝之大將李懷光，皆靺鞨——今吉林黑龍江境內通古斯族——人；玄宗朝大將論弓仁，肅宗朝大將論惟貞，皆吐蕃人；玄宗朝大將哥舒翰本突騎施——西突厥別部——人，李光弼副將白孝德本安西胡人，德宗奉天定難功臣李元諒本安息人，玄宗朝之秘書監朝衡本日本人，原名阿部仲麻呂，皆歸化人中之卓有聲望者。（註四十）

註一、看東洋史第二編一〇七至一〇九頁高句驪之勃興

註二、看同 一〇九至一一〇頁百濟之勃興

註三、看同 一一一至一一五頁高麗百濟之競爭三國內部之和戰

註四、看同 一六二至一六六頁高麗與隋之衝突

註五、看同 高麗與唐之衝突

註六、看同 一六七至一六八頁百濟之衰亡

註七、看通鑑紀事本末卷一七四唐平遼東內儀鳳元年條

註八、看東洋史一六八頁高麗之衰亡

註九、看通鑑紀事本末卷一七四唐平遼東內總章二年條  
註十、看同 儀鳳元年條

註十一、看同 儀鳳二年條

註十二、看唐書各本人傳

註十三、看東洋史第二編第四十九頁西域諸國之形勢

註十四、看前漢書第二十四卷蘇武傳第六十四卷匈奴傳

註十五、看東洋史第二編四六至四八頁大月氏之西遷

註十六、看同 五八至六一頁烏孫之分合

註十七、看同 一四三至一四五頁嚙噠之勃興

註十八、看同 一四七至一五〇頁突厥之強盛

註十九、看同 一五三至一五七頁東突厥之末路

註二十、看通鑑紀事本末卷一六七太宗平突厥內貞觀四年條下

註二十一、看唐書突厥傳及各本人傳

註二十二、看通鑑紀事本末卷一六八唐平鐵勒

註二十三、看唐書各本人傳

第五章 註

註二十四、看東洋史第三編一至七頁回紇之衰亡

註二十五、看唐書沙陀傳

註二十六、看五代史各本人紀傳

註二十七、看唐書黨項傳，五代史李仁福傳，宋史夏國傳

註二十八、看東洋史第二編一八二頁贊普之家世

註二十九、看同 一八七頁吐蕃對唐室之衝突

註三十、看東洋史第三編一〇頁吐蕃全盛時代

註三十一、看同 一二頁安西北庭之淪陷

註三十二、看同 一三頁吐蕃衰亂時代

註三十三、看宋史吐蕃傳

註三十四、看東洋史第三編一四一頁吐蕃之降附

註三十五、看唐書奚傳

註三十六、看唐書各本人傳

註三十七、看唐書契丹傳

註三十八、看唐書李光弼傳

註三十九、看唐書各本人傳

註四十、看唐書各本人傳及渤海國志卷四第六頁任雅相爲渤海文王大欽茂之舅條

第五章  
註

## 第六章 漢族第三次蛻化時代 五代及宋元

### 小引

南匈奴鮮卑氐羌之雜居中國，在東漢初年，至西晉末年，五胡亂華之禍始出現；沙陀黨項契丹之雜居中國，在有唐初年，至五代及宋初，遼夏壓迫中國之禍復出現；蓋西北民族自有史以前至現在，始終有向東南方面移動之趨勢，一有機會可乘，動輒闖入中國內地，歷漢至宋，無二致也。沙陀李氏，石氏，劉氏之根據地在太原，所創立皆短命帝國，影響於漢族者較小，其與漢族混合也較易；黨項李氏之根據地在綏遠，其勢力範圍伸張至陝甘內地，契丹耶律氏之根據地在熱河，其勢力範圍伸張至京兆直隸山西內地，所創立皆大國，建國之年代較久，終北宋一代，不能與之混合；女真勃興，始滅遼，與契丹混合，蒙古勃興，復滅夏，與黨項混合，滅金，與女真混合，滅宋，與漢族混合，於是黨項契丹女真，同在蒙古勢力範圍之下，與漢族融化，變成極複雜之混血族，漢族第三次蛻化之機始成熟矣。茲述其事蹟如左：



## 第一節 契丹之漢化

自有唐中葉以後，回紇統一外蒙古，契丹懼其強大，爲所羈縻；每歲選酋豪數十人入長安朝會，朝廷惡其外附回紇，不復授官爵。武宗會昌二年，——西歷紀元八四二年——回紇爲黠戛斯所滅，契丹酋屈戌復內附，幽州節度使張仲武奏請收其回紇所與舊印，更賜以新印。懿宗咸通中，——八六〇至八七三——其王習爾之在位，部衆漸強。習爾之卒，族人欽德——舊五代史作沁丹，新五代史作遙輦，皆同音異譯也。——立，時唐室衰亂，中原多故，無暇顧及北方；欽德乘機侵畧諸部，奚，室韋，達靼之屬咸役屬之；南侵幽州，節度使劉仁恭以堅壁清野策拒敗之，契丹乃乞盟，獻良馬求市牧地，諸部謂欽德不任事，選耶律阿保機代之，於是大賀氏王統絕。阿保機雄武有大畧，契丹舊有八部，部各有大人，推一人爲王，建旗鼓以號令諸部，三年一代，以次爲之。阿保機當國時代，適值後唐與後梁構兵，黃河流域民不安席，幽涿之人多亡入契丹；阿保機亦間入塞，虜掠中國人民；以威脅制諸部，不肯受代，在位九年，七部共劫之，阿保機不得已，傳旗鼓。自

以所得漢人多，請帥種落居古漢城，——後魏滑鹽縣，本漢縣，故城當在今熱河特區西南境。——別自爲一部；漢城地宜五穀，有鹽池之利，阿保機率漢人耕種，爲治城郭邑屋廛市，如幽州制度，漢人安之。阿保機知衆可用，邀諸部大人以牛酒會鹽池，伏兵其傍，酒酣伏發，盡殺之，遂以兵威脅服諸部，自立爲王，遂稱皇帝，是爲太祖。以幽州人韓延徽爲謀主，建牙開府，置百官，築城郭，立市里，以處漢人，使各有配偶，墾藝荒田，由是漢人安業，逃亡者少。又以中國隸書之半增損之，製契丹文字數千，制婚嫁，置官號，一切文物制度皆倣中國，由是契丹民族漸被漢化。北侵黑龍江上流流域之室韋，下流流域之女眞，皆下之，於是東北諸部落皆入於契丹；西征突厥，吐谷渾遺族與黨項，沙陀諸部，皆下之，於是內蒙古西部亦入於契丹；南侵晉，破蔚——今直隸口北道蔚縣——新——今口北道涿鹿縣——武——今山西雁門道五寨縣——媯——今口北道懷來縣——儒——今口北道延慶縣——五州，於是現今直隸口北道北部，山西雁門道北部與興和，綏遠二道地皆入於契丹，陰山之險爲契丹所有，山陝北境無險可守；復移師東下，侵畧幽州，畧取現

在山海關以南地，燕山山脈之險爲契丹所有，順直北境無險可守；復旋師滅渤海，畧取現在松花江流域，國勢日張。後唐明宗天成二年，——九二七年——太祖殂，太宗即位，乘中國有內亂，屢發兵南侵，助後唐叛將石敬瑭滅後唐，敬瑭割燕——今北京——雲——今山西雁門道大同縣——等十六州以賂之，於是現今京兆，直隸，山西北部皆入於契丹。敬瑭殂，出帝即位，以事激怒契丹，太宗自將南侵，開運三年，——九四六年——破汴梁，執出帝，遷之黃龍府，——今吉林吉長道農安縣——大掠河南州縣；由是內外怨憤，皆思逐之，所在盜起，太宗不能制；居汴僅三月，北還，在路遇病，還至臨城——今直隸大名道臨城縣——而殂，所得之地旋爲中國後漢劉氏所恢復。（註一）

自此以後，契丹日益漢化，改國號曰遼，倣唐制，設公——太尉司徒司空——師——太師太傅太保——省——中書門下尙書三省——臺——御史臺——寺——太常，崇祿，

本光祿寺

避太宗諱改名

衛尉，宗正，太僕，大理，鴻臚，司農等七寺——監——秘書，司天，國子，太府，少府，將作，都水等七監——等官，謂之南面，以治漢地租賦軍民之事，又

置漢人樞密院，掌漢人兵馬之政。中葉以後，官制益備，有給諫，有郎官，有諸衛，有東宮官，翰林掌內制，中書舍人掌外制，國史有院，起居有註，京府方州兵刑財賦之官皆用漢名，於是南面官殆遍於國內矣。（註二）其地方官制，有五京，——上京臨潢府，中京大定府，東京東平府，西京大同府，南京析津府。——六府，——定理，率賓，鐵利，安定，長嶺，鎮海六府——州軍城一百五十六，縣二百零九，部族五十二，屬國六十，東至於海，西至金山——今阿爾泰山——暨於流沙，南至白溝，——今京南琉璃河——北至臚胸河，——今外蒙古車臣汗部克魯倫河——幅隕萬里，爲當時亞東第一大國。（註三）

道宗——一〇五五至一一〇一——在位，溺於漢化，國勢寢衰；道宗好文學，採用科舉制度，登庸新進人物，漢文漢詩流行於社會；又崇拜佛教，手寫華嚴經，親迎佛骨，禁止殺生，一歲而飯僧三十六萬人，一日而祝髮者三千人，日日言慈悲，言功德，而骨肉之間不能相保；皇后蕭觀音美而賢，工詩，善談論，自製歌詞，尤善琵琶；生太子濬，幼而好學知書，工騎射，嫺辭令；爲權臣耶律伊遜所

誣，相繼被害。羣小雜進，朝政日非，契丹固有慄悍之風消滅殆盡，蒙古諸部時常背叛，遼室疲於兵役（註四）。傳至天祚帝，爲女真所滅而國亡，契丹遺民皆在女真勢力範圍之內被同化於漢族。

## 第二節 女真之漢化

女真之先爲古之肅慎氏，隋時稱靺鞨，分粟末，伯咄，安車骨，拂涅，號室，黑水，白山等七部，而粟末黑水二部最強。唐初，粟末部酋長大祚榮創立渤海王國，畧取現在東三省與俄領阿穆爾省及東海省南部皆爲領土，輸入中國文化，開闢東方草昧，黑水以下諸部皆隸屬之，爲海東盛國。渤海亡後，諸部附屬於遼，其部落在南者繫籍於遼，號熟女真，在北者不籍於遼，號生女真。生女真完顏部酋長阿骨打有雄畧，乘遼室之衰，舉兵作亂，畧取現在松花江流域；宋徽宗政和五年，——西歷紀元一一一五年——自立爲帝，國號金，是爲太祖；連破遼兵，盡取現在吉林奉天熱河京兆等地，遂滅遼。（註五）又命文臣固新，仿漢字楷書，因契丹字制度，合本國語，製女真字。宣和五年，——一二三三年——，太祖殂，弟太

宗即位，與北宋起衝突，連破宋兵，盡取現在直隸山東山西河南與江蘇安徽北部——淮北——陝西中部，甘肅中部南部，與宋以秦嶺山脈及淮水爲界，建五京，——上京會寧府，中京大定府，東京遼陽府，西京大同府；南京大興府——十四總管府，凡分十九路；疆域東至於海，西抵賀蘭，南距淮水及秦嶺，北逾沙漠，幅隕之廣，爲當時亞東第一。（註六）

熙宗在位，採用中國制度，設三師，三公，尙書省，樞密，宣徽，翰林院，御史臺，太常，大理寺，秘書，國子，太府，少府，軍器，都水監等官，大率循遼宋之舊而加精整。（註七）是時皇伯父幹本以首相當國，雖軍國多故，而吏清政簡，百姓樂業。幹本卒後，皇后裴滿氏干政，熙宗爲后所制，內不能平，因縱酒自遣，醉後往往手殺近臣，大臣人人自危。宋高宗紹興十九年，——一一四九年——從弟亮弑之而自立，是爲海陵煬王；大殺宗室及功臣與宋遼宗室之在其國者，納其叔母及諸宗婦與諸從姊妹於後宮。淫虐凶暴無復人理。紹興三十一年，——一一六一年——大舉兵南侵宋，參贊軍事中書舍人虞允文大破其兵於采石，——在今安徽

蕪湖道當塗縣西北二十里牛渚山下突入江之處名采石磯——亮東趨揚州，中途爲部下所弑，從弟世宗即位。（註八）

世宗恭儉仁慈，即位以後，與南宋媾和，與民休息，群臣守職，上下相安。在位二十九年，——一一六一至一一八九——家給人足，倉廩有餘，國人稱之曰小堯舜。然是時金室承平已久，逐漸漢化，世宗深憂之，屢詔太子及宰相，無忘女真舊風；創設國語學校，以女真文譯中國經史子書，命學士大夫學習女真文，又勅女真人不得譯爲漢姓；世宗之孫章宗時，復勅女真人不得學南人裝束；其拳拳以保守舊風爲念如此，可謂思深慮遠。然歷代君主一方面雖極力提倡女真文，一方面却非常嗜好漢學；熙宗善讀漢書，海陵煬王好詩詞，世宗好詩，章宗好詩古文，世宗時設進士科，以漢學取士；章宗時，又勅有司購求遺書。當時文人學士，若黨懷英，趙秉文，元好問等，皆爲一代文豪，所著之詩文，實足以證明金代漢學發達之盛況。（註九）

同時戶口逐漸減少，武力逐漸衰退；先是熙宗時代，慮漢民攜貳，乃創設屯

田軍，徙女真部民及奚契丹降人於中國內地，計其戶口，授以官田，使自播種，春秋量給其衣，遇出征時始給錢米。其屯田區域，徧於現在黃河流域六省，直抵淮北與秦嶺山脈之北，築壘於村落間，與漢民雜居。後復集女真部民於各省要害地，築城以居，其組織畧與前清各省駐防旗相似。其後屯田之人習於怠惰，傭漢人爲農奴以耕，遊手好閒，無所事事，生活逐漸困難，乃賣却不動產，轉移四方，於是漢人城鄉市鎮中添出許多新人，女真屯田軍營中，減却若干戶口，武力逐漸衰退。至衛紹王在位，——一二〇九至一二一三——柔弱鮮智能，蒙古成吉思汗勃興，乘隙南侵，盡取現在熱，察，京兆三區與直隸，山東，山西及東三省，驅逐金人於河南；傳至哀宗天興三年，——一二三四年——卒爲蒙古所滅，女真遺民皆在蒙古勢力範圍之內被同化於漢族。

### 第三節 蒙古之漢化

蒙古族之根據地，在今外蒙古東部，氣候苦寒，爲天然現象所驅，常有南下之勢。秦漢之交，畧取內外蒙古，建立遊牧大帝國，史書稱之曰匈奴。東漢中葉



，南匈奴南遷中國，北匈奴西遷歐洲以後，外蒙古空虛，鮮卑人乘勢徙據其地，匈奴餘種十餘萬落皆降於鮮卑。南北朝時代，鮮卑別部柔然占領外蒙古，國勢強盛，其可汗社崙，舉兵攻匈奴別部，與其酋長拔也稽戰於額根河，——今鄂爾坤河——大破之，併其衆。柔然衰亡，外蒙古爲突厥所占領，唐時，蒙古族附屬於室韋，舊唐書稱之曰蒙兀室韋，新唐書稱之曰蒙瓦部，其根據地在俱倫泊——今呼倫池——東，室建河——今額爾古納河——南。宋初，移居不兒罕山麓，其地爲斡難河，——今鄂嫩河——怯綠連河——今克魯倫河——發源地，水草較爲豐富，宜於牧畜，部族漸強。金室勃興以後，先後遣萬戶胡沙虎，都元帥兀朮相繼征之，不能克；與之和，割西平河——今克魯倫河——下游北二十七團寨與之，歲遺甚厚，冊其酋長忽都剌爲蒙輔國王，不受。南宋中葉以後，金室溺於漢化，武力漸衰；蒙古偉人成吉思汗乘機舉兵滅金室，占領中國北部，是爲太祖。其子太宗，孫定宗，憲宗，世祖皆英主，陸續遣兵四出征伐，占領亞洲大部及歐洲東北部，創立空前絕後之蒙古大帝國；其領土之廣與現在俄國相伯仲，而地方之富庶則遠過之，與現在英國相

伯仲，而氣脈之聯絡，形勢之團聚則遠過之。世祖至元五年，——一二六四年——入都於燕，以劉秉忠爲太保，參領中書省事，姚樞，許衡，廉希憲，商挺，宋子貞，張德輝等相繼入閣。至元八年，——一二七一年——改國號曰元，一切典章文物皆倣中國。傳至順帝至正二十八年，——一三六八年——爲明太祖所滅而國亡，蒙古遺民大半留居中國內地，與漢族同化。（註十）

#### 第四節 西域諸國人之漢化

蒙古先破金，取河北；繼滅乃蠻，花刺子模與西北各小國，取西域；復滅夏，滅金，滅宋，盡取中國本部；西域人之從軍者，被虜者，貿易者，接踵而入中國，與漢族雜居；一傳再傳，逐漸漢化。元初，分人民爲四階級：曰蒙古，本部人屬之；曰色目，西域諸國人皆屬之；曰漢人，舊金領土內之漢人契丹人女真人高麗人及雲南四川二省之漢人屬之；曰南人，除四川外，凡舊宋領土內之漢人屬之；當時鄉會試分兩榜，蒙目色目爲右榜，漢人南人爲左榜；凡內外各行政機關，皆以蒙古或色目人爲長官，而漢人南人貳焉。色目人中學者輩出，若畏吾兒人

廉希憲，家鉉翁，阿魯渾薩里，康里人不忽朮及其子回回，巉巉，雍古部人趙世延，馬祖常，伯牙吾氏之泰不華，哈刺魯氏之伯顏師聖，也速答兒赤，汪古部長駙馬高唐王闊里吉思，回回人瞻思丁，及其子忽辛，大食國人瞻思等皆儒學家；泰不華與葛邏祿人迺賢，唐兀人余闕，西域人伯顏子中，丁鶴年，朶魯別族人郝天挺，回回人薩都刺等皆詩人；趙世延，馬祖常，余闕，瞻思與畏吾兒人貫雲石等皆文學家；不忽朮，貫雲石與西域人馬九皋，瑣非復初等皆詞人；此外書家畫家建築學家尙多，或寄居中國內地，或仍住在塞外各部落，而其原籍則皆西域人也。其餘若政治家，軍人中西域人尙多，茲不贅述。（註十二）

註一、看唐書契丹傳，五代史契丹傳。

註二、看遼史百官志

註三、看遼史地理志

註四、看東洋史第三編七五頁契丹之漢化，遼史道宗本紀，宣懿皇后蕭氏傳，順宗傳。

註五、看東洋史第三編七六至八一頁女真之勃興

註六、看金史地理志

註七、看金史百官志

註八、看金史熙宗本紀，海陵本紀。

註九、看金史世宗本紀，章宗本紀。

註十、看東洋史第三編八五至一六四頁蒙古勃興諸章

註十一、看陳垣著元西域人華化考

第六章  
註

## 第七章 漢族第三次休養時代 明

### 小引

秦漢隋唐四朝爲大帝國，宋明二朝爲小帝國；秦漢隋唐對外方針爲積極的，趨於進取，故東夷西戎南蠻北狄侵擾東周數百年，而混一於秦漢，匈奴烏桓鮮卑氐羌侵擾三國兩晉及南朝數百年，而混一於隋唐；宋明對外方針係消極的，趨於保守，故契丹黨項女真侵擾宋室三百年，而混一於元，韃靼瓦剌侵擾明室三百年，而混一於清；漢唐時代漢族之蛻化係自動的，吸收他族而融化之，宋明時代漢族之蛻化係他動的，受外族所吸收而與之融化；宋代漢族向外發展力極弱，而外族向內發展力極強，故史域之伸縮極大，史蹟之波瀾極壯闊；明代漢族向外發展力極微，外族向內發展力亦有限，故史域之伸縮極小，史蹟殊覺寂寥也。茲述其事蹟如左：

### 第一節 雲南之漢化

雲嶺以南地方，爲苗蠻雜居地，地處中國西南，屬亞熱帶地方，居雲嶺之脊

。地勢高燥，氣候溫暖，夏無大暑，冬無大寒，花無斷時；居民受其影響，體魄較爲健康，腦筋較爲清醒，與安南、暹羅、緬甸之土人情形稍有不同；金沙江、元江、瀾滄江，怒江流貫其間，交通較爲便利，農產亦甚豐盈，所謂地靈者人傑，雲南之開化較易於他方，亦天賦之惠使之然也。自戰國末年，楚王族莊蹻奉

楚威王命，將兵循江上畧巴——今四川東川道——黔中——今貴州黔中道——以西；遂至滇池，——今雲南昆明池——畧定其傍各部落，因以其衆王滇，是爲漢族建國於雲南之始。漢武帝時，使王然于使滇，諷使其王入朝，滇不奉命；詔將軍郭昌發巴蜀兵臨滇，滇王恐，舉國降，請置吏，入朝；詔以其地爲益州郡，——今雲南滇中道故雲南府——賜滇王玉印，復長其民，是爲雲南東部直隸於中央政府之始。東漢明帝時，哀牢夷內屬，置永昌郡——今雲南騰越道故永昌府——以治之，是爲雲南西部直隸於中央政府之始。三國時代，益州耆帥——耆西南夷部落名——雍闓反，與郡人孟獲畧據益州牂牁——今貴州黔中道故遵義平越二府——越雋——今四川建昌道故寧遠府及越雋衛——永昌四郡，蜀漢丞相諸葛亮南征，討平之；置庾降都督駐守其地，

鎮平夷。——今滇中道平彝縣——晉武帝時，置寧州刺史，治庾降故地。五胡亂華時代，成李氏據四川，以武力壓迫雲南；寧州刺史李毅，王遜，皆以一介武臣，率數千疲卒，鎮守遐荒，內撫蠻夷，外抗成李氏，威惠甚著。王遜卒後，嗣任者非將帥才；晉室衰微，中原多故，中央政府之勢力不及於雲南，土豪爨氏乘機自爲雄長，對於中國南朝，雖稱臣納貢，受其封號，而時叛時服，不受中央政府節制；中國雖屢次用兵，迄未能操必勝之算也。有唐初年，滇西蒙氏勃興，併吞近旁各小部落，建立南詔王國；乘爨氏內訌，盡取其地；北與唐室，西與吐蕃交通，利用雙方武力，使之互相牽掣；又乘安史之亂，中國邊備虛弱，進兵侵畧四川南部，取劍南節度使屬下各羈縻州；其全盛時代領土，北抵四川南部，川邊南部，東抵貴州西南部，廣西西部及越南北部，爲南方大國，與唐室對峙者二百餘年，武力之強亞於吐蕃回紇。復遣皇室及大臣之子弟留學中國，登庸漢族降人整理內政，招徠及虜掠西川匠人大興工業，文化之隆亞於新羅日本。（註二）唐室亡後，南詔亦衰，長和鄭買嗣，——九〇二至九二八——天興趙善政，——九二八至九二九



——義寧楊千貞，——九二九至九三七——相繼篡立，以暴易暴，不旋踵而滅，國祚之短尙不及後五代。（註二）段氏勃興，段思平以北方漢族苗裔建國於南方，承襲南詔正統，國號大理；崇拜佛教，取持盈保泰主義，不勤遠畧；傳十四世，一百五十八年——九三七至一〇九四——而中絕，世臣出身之宰相高昇泰代立，國號大中，在位二年——一〇九四至一〇九六——而殂，遺命以國仍還段氏，史稱後理；（註三）又傳八世，一百五十七年，——一〇九六至一二五三——爲蒙古世祖忽必烈所滅，封皇五子忽哥赤爲雲南王，世鎮雲南，降段氏君主爲總管，世鎮大理。（註四）——大理後理故都即今雲南騰越道大理縣——有元末年，中原大亂，雲南僻在西南，忽哥赤裔孫把匝剌瓦爾密以梁王鎮守其地，撫治有威惠，境內粗安。明太祖洪武十四年，——一三八一年——以傅友德爲征南將軍，藍玉，沐英副之，征雲南；大破其兵於白石江，——在今滇中道曲靖縣東北——把匝剌瓦爾密自殺，進克大理，擒總管段世，雲南平，置雲南布政使司，都指揮使司各一，詔友德及玉班師還京，留英以西平侯鎮雲南。英沈毅寡言笑，好賢禮士，撫卒伍有恩，在滇百務具舉，簡守令

課農桑，歲較屯田增損以爲賞罰，墾田至百萬餘畝，浚滇池以防水患，通鹽井之利以來商旅，辨方物以定貢稅，視民數以均力役，疏節濶目，民以便安，於是雲南戶口日增，文化日進。英卒，子春，屢，昂相繼鎮守雲南，以戰功進世爵爲黔國公，子孫世襲。沐氏累代多名將，邊人畏其威，懷其惠，於是雲南乂安，土人多數與漢族同化。（註五）

有明衰亡，沐氏最後之黔國公天波殉國，清廷以降將平西王吳三桂留鎮雲南。清聖祖康熙十二年，——一六七二年——三桂舉兵反，陷雲貴湖南四川等省，靖南王耿精忠以福建，平南王尙之信以廣東，將軍孫延齡以廣西，提督王輔臣以陝西，總兵楊嘉來以襄陽應之，中國大亂，騷擾及於浙江江西甘肅；朝廷竭全國之力，費八年之光陰，僅得蕩平之，始廢除武臣世鎮之制，由雲貴總督及雲南巡撫，提督分掌民政，軍政，然土司之世襲者自若。（註六）

以上所舉雲南境內諸酋長：莊躋，鄭買嗣，段思平皆漢族，雍闓，孟獲，爨氏，蒙氏，趙善政，楊千貞皆土人，雲南王忽哥赤，西平侯沐英，平西王吳三桂爲中央政府派遣之鎮守大臣；計雲南有史以來二千餘年，由部落制度進爲半獨立

國家，又進爲獨立國家；其對於中國之關係，初爲漢族建設之殖民國家，次爲直隸於中央政府之州郡，次爲羈縻之屬國，最後仍爲直隸之州郡；其對於中國分離合併之歷史頗似朝鮮越南，朝鮮越南夷爲外人奴隸，而雲南猶爲我國同胞，溯厥由來，不能不歸功沐氏也。

## 第二節 貴州之漢化

貴州居苗嶺上，爲苗族分布地之中心點，古羅施鬼國，漢西南夷牂牁武陵——今湖南武陵道故常德府——諸傍郡地；自蜀漢時，夷有火濟者，從諸葛亮南征孟獲有功，封羅甸國王，子孫世襲，歷唐及宋，皆以歸順不失爵土，元置八番——今貴州黔中道定番縣——順元——同貴陽縣——諸宣慰司以羈縻之。太祖初平陳友諒，兵威振南服，思南——治所在今貴州鎮遠道思南縣——宣慰使田仁智，思州——治所在今鎮遠道思縣——宣撫使田仁厚率先歸附，即以故官授之，命世守其地。洪武五年，——一三七二年——火濟後裔貴州宣慰使霽翠，同知宋欽及普定——今貴州貴西道普定縣——女總管適邇等先後來歸，皆予以原官，世襲，賦稅聽自輸納。已而仁智之孫

思南宣慰使田宗鼎，仁厚之孫思州宣撫使田琛構怨，相仇殺，朝廷屢禁之，不能止；成祖永樂十一年，——一四一三年——命鎮遠侯顧成率師擒之，送京師；——分其地爲思南，——今鎮遠道故思南府——鎮寧，——今貴西道故鎮寧州——銅仁，——今鎮遠道故銅仁府——烏羅，治所在今銅仁縣西——思州，——今鎮遠道故思州府——新化，——故城在黎平境內——黎平，——今鎮遠道故黎平府——石阡——今鎮遠道故石阡府——等八府，鎮遠，——今鎮遠道故鎮遠府——安順，——今貴西道故安順府——永寧，——今貴西道關嶺縣故永寧州——普安——今貴西道普安縣——等四州，設貴州布政使司，而以長官司七十五分隸焉，貴州爲內地自此始。（註七）清聖祖康熙三年，——一六六四年——靛翠後裔水西宣慰使安坤作亂，吳三桂以雲貴兵討平之，分其地爲黔西，——今貴西道黔西縣故黔西州——平遠，——今貴西道織金縣故平遠州——大定，——今貴西道故大定府——威寧——今貴西道故威寧州——四府。三藩之亂平，清室餘威震於殊俗，世宗雍正四年——一七二六年——以鄂爾泰巡撫雲南，爾泰奏請改土歸流，從之；六年，以鄂爾泰爲雲貴廣西總督，盡罷三省境內諸土司，改爲流官，有不服者，

以武力鎮壓之，經營五年，始克成功，於是西南苗民逐漸漢化。（註八）

註一、看東洋史第三編一五至二三頁南詔之勃興，中國史第二編第五章第四節漢與西南夷之關係。

註二、看東洋史第三編五三至五五頁南詔之衰亡

註三、看同 七一至七三頁大理之衰亡

註四、看新元史忽赤哥傳

註五、看明史把匝刺瓦爾密傳，沐英傳。

註六、看聖武記康熙戡定三藩記

註七、看明史貴州土司傳

註八、看聖武記雍正西南夷改流記

## 第八章 漢族第四次蠟化時代 清

### 第一節 滿洲之漢化

清室以滿洲民族入主中國，頗有移風易俗之意，順治初年，下令漢民薙髮，易衣冠，概從滿洲制（註一）；許漢族官民通婚，禁止漢人婦女纏足（註二）；又令翰林院庶吉士分別讀滿漢書，準滿洲蒙古八旗子弟以滿文應鄉會試（註三）；又設宗學，選滿洲官教習宗人滿書，（註四）設八旗官學，使八旗子弟入學，學習滿漢書（註五）；京師設滿洲蒙古漢軍八旗，每旗各以都統掌之，各省分設駐防旗，以將軍，都統，副都統，城守尉或防守尉掌之，以武力鎮壓各處人民，強制漢族使之同化於滿族。然京師八旗及各省駐防旗人與漢族雜居日久，習於漢俗，讀漢書，學漢語，飲食起居皆同化於漢族；浸假而滿文廢棄，浸假而滿語淪亡，甚至鄉僻小縣駐防旗人，爲結婚便利起見，婦女亦間有纏足，學漢人裝束者。奉天東北部及吉林黑龍江二省，本滿洲民族發祥地，清初，禁止滿洲以外人民移殖，而提倡本地土人屯田；初由屯駐於吉林，——今吉林縣——伯都訥，——今吉林濱江道扶餘

縣——阿什河，——一名阿勒楚喀即今濱江道阿城縣——寧古塔，——今延吉道寧安縣——三姓，——今依蘭道依蘭縣——等處旗人着手開墾，聖祖康熙二十五年，——一六八六年——與俄國啓釁，政府爲國防起見，屯田於黑龍江沿岸及齊齊哈爾；——今黑龍江省城龍江縣——世宗雍正十三年，——一七三五年——移奉天八旗於呼蘭河流域屯田，乾隆，嘉慶年間，復移殖中國本部罪人前往開墾，然卒無成效。乾隆中年，——一七九〇年——直隸，山東荐飢，貧民無法生活，相率破禁潛往；最初爲旗人僱工人，稍有餘暇，即從事開墾荒地；移住之民漸多，地利日闢，本地滿洲惰民亦往往秘密賣其土地與移住民，於是東三省土地所有權逐漸轉移於漢族。山東與東三省南北相對，僅隔渤海一衣帶水，交通甚便；其地居黃河下流，其人口密度居全國之冠，而東三省原有之滿洲人，清初多數移殖於關內，充各處駐防，故煙戶稀疏；山東人對於滿洲情形較爲熟悉，故移殖者較各省人爲多，清政府當局設法極力防止之，然大勢所趨，終無效果。已而俄人以西伯利亞爲根據地，南下經營滿洲，文宗咸豐八年。——一八五八年——依愛琿條約，割黑龍江北岸與俄，置阿穆爾

省；十年。——一八六〇年——依北京條約，割烏蘇里江東岸與俄，隸屬東海濱省；東北藩籬全撤，大勢漸不能支；政府爲對抗俄人計，開放滿洲一部分，允許內地漢人移住開墾；德宗光緒十三年，——一八八七年，遂允全部開放。十八年，——一八九二年——俄國修築東清鐵路，勞動者之需要驟增，食物之需要亦增，開墾之事業亦因而發達，滿洲移民驟呈活潑氣象，每年由山東移住者數以十萬計，東三省全部皆漢化，只有省城駐防營一小部分，猶多少保存滿洲舊風而已。（註六）

## 第二節 內蒙古之漢化

內蒙古特別三區，爲漢族蒙族雜居地，漢唐全盛時代皆隸屬中國，漢室在現在熱河平泉縣置右北平郡，京兆薊縣置漁陽郡，口北道懷來縣置上谷郡，山西雁門道平魯縣置雁門郡，綏遠和林格爾縣置定襄郡，托克托縣置雲中郡，五原縣置五原郡，鄂爾多斯右翼後旗置朔方郡，左翼前旗置西河郡，以監視熱河北部之烏桓，鮮卑，並防護綏遠境內之匈奴；唐室在現在北京置范陽節度使，熱河朝陽縣置平盧節度使，山西雁門道大同縣置大同節度使，綏遠歸綏縣置振武節度使，五



原縣置天德軍防禦使，甘肅靈武縣置朔方節度使，以監視熱河境內之奚，契丹，並防制綏遠邊外之突厥，回紇。唐亡以後，熱察二區沒於遼，綏遠沒於夏，終有宋一代不能恢復；遼亡，熱察二區入於金，夏與金相繼衰亡，熱察綏三區入於元；明室勃興，驅逐元人於漠北，在現在熱河平泉縣置大寧衛，赤峯縣置全寧衛，察哈爾多倫縣置開平衛，山西大同縣置大同都衛，綏遠東勝縣置東勝衛，甘肅寧夏縣置寧夏衛，以防禦外蒙古境內之韃靼，瓦剌。有明中葉以後，武力寢衰，大寧全寧開平東勝諸衛皆放棄或移置，熱察綏三區復淪入蒙古；清初，相繼來降附，朝廷分熱河境內之蒙古部落爲東四盟，綏遠境內之蒙古部落爲西二盟，置熱河都統，綏遠將軍以監視之，分察哈爾境內蒙古爲東西二翼，置察哈爾都統以管理之，一面提倡喇嘛教以減殺蒙古人之生殖力，一面遮斷交通以封閉蒙古人之耳目，定制蒙古人不準延聘內地書吏教習，不準私自開墾，然口內貧民固時常有私往開墾者，（註七）熱河方面多直隸京兆人開墾，察哈爾左翼張北，沽源，多倫等縣多直隸人開墾，右翼豐鎮，興和，涼城，陶林等縣多山西人開墾，（註八）綏遠方

面多山西陝西人開墾；語言亦各從其鄉貫，爲京兆直隸山西陝西鄉音，流行於各區。蒙人與漢人雜居久，知自種之利多，出租之利少，遂由牧畜生活變爲耕稼生活，操作一如漢人，惟堅忍耐勞程度畧有遜色；（註九）語言亦多操漢語，純熟一如漢人，且往往有不能操蒙語者；大抵漢人足蹟之初至河套，約當乾隆之時，至道光咸豐間而極盛，至光緒末年，貽穀以綏遠將軍兼墾務大臣，而墾務乃大壞，盡奪民墾之地入官，又以重價租與民，於是蒙人失所有權，漢民失占有權，相率群起反抗貽穀，（註十）朝廷派軍機大臣鹿傳霖往查辦之，貽以重賄賂首相慶親王奕劻，卒得無事。

自有清中葉以後，內蒙古生聚逐漸蕃衍，朝廷於熱河境內置張家口，——今張北縣——獨石口，——今沽源縣——多倫諾爾——今多倫縣——三廳，隸於直隸，於察哈爾綏遠境內分置十二廳，隸於山西，欲以漸改爲郡縣制度。民國成立，外蒙古受俄人蠱惑，倡言獨立，政府有鑑於此，乃改熱察綏爲特別區域，置都統爲其長官，直隸於中央政府，其下分設各縣，割直隸之承德一府，圍場一廳隸熱河，直隸之

張家口，獨石口，多倫諾爾三廳，山西之豐鎮——今縣——寧遠——今涼城縣——興和——今縣——陶林——今縣——四廳隸察哈爾，歸化，綏遠——今歸綏縣——薩拉齊——今縣——清水河——今縣——托克托——今縣——和林格爾——今縣——五原——今縣——武川——今縣——東勝——今縣——九廳隸綏遠，盡改爲縣，設知事以管理之，與內蒙古諸部雜居，於是內蒙古逐漸漢化。

### 第三節 新疆之漢化

帕米爾高原以東，爲東亞各民族發祥地，漢時名爲西域，天山北路屬烏孫，天山南路分三十六國，附屬於匈奴。漢武帝擊破匈奴，收復現在綏遠及甘肅北部爲中國領土，遣使通好烏孫，妻以公主，招來天山南路諸小國爲保護國，置西域都護以統轄之，於是現在新疆全省皆入於漢。漢衰，西域諸小國復分離而獨立，兩晉南北朝時代，爲前涼，後涼，北涼，後魏，柔然，高車，嚙噠，突厥所羈縻；唐興，復恢復之，在現在迪化道迪化縣置北庭都護府，吐魯番縣置西州都督府，統轄天山北路；阿克蘇道庫車縣置安西都護府，焉耆縣置焉耆都督府，喀什

噶爾道于闐縣置于闐都督府，疏勒縣置疏勒都督府，統轄天山南路，於是新疆全省復入於唐。唐衰，分隸於吐蕃，回紇；遼室全盛時代，羈縻於遼；遼亡，隸於西遼；西遼亡後，隸於蒙古；蒙古在現在迪化縣置別失八里元帥府，伊犁道置阿力麻里元帥府以統轄之，於是新疆全省入於元。元衰，復分爲若干部落，隸於瓦剌；清初，分爲厄魯特四衛拉——瓦剌之音轉——部，曰綽羅斯，牧伊犁；曰都爾伯特，牧額爾齊斯；——河名，回語遼緊之謂，言其河水湍溜駛急也。在阿爾泰山之南二百里，科布多之西三百餘里，雅爾之東，烏魯木齊之北各八百餘里，後爲屯田之所。曰土爾扈特，牧雅爾；——今伊犁道塔城縣即塔爾巴哈臺——曰和碩特，牧烏魯木齊；——今迪化縣——聖祖康熙中，綽羅斯酋長噶爾丹篡立，自稱準噶爾汗，併吞四衛拉特及南部回疆城郭諸國，東侵喀爾喀土謝圖汗部，破土謝圖汗及車臣汗，札薩克圖汗兵，畧據外蒙古，二十九年，——西歷紀元一六九〇年——復南侵內蒙古，朝廷遣兵拒戰於烏蘭布通，——山名在熱河赤峯縣東南——大破其兵，噶爾丹遁還。（註十一）三十四年，復大舉入寇，撫遠大將軍費揚古大破其兵於昭莫多。

，——譯言大樹林也。在肯特山之南，土臘河之北，汗山之東。——噶爾丹走死，其兄子策妄拉布坦據伊犁爲根據地，侵畧青海西藏，五十八年，朝廷發大兵兩路攻之，復西藏。世宗雍正五年，——一七二七年——策妄拉布坦卒，子噶爾丹策零立，狡黠好兵，屢犯邊，七年，朝廷發大軍兩路攻之，不克。（註十二）高宗乾隆十年，——一七四五年——噶爾丹策零卒，子那木札爾立，童昏無行，諸酋長弑之，立其庶兄刺麻達爾札，部將阿睦撒納復襲殺之而立其同族達瓦齊，國內大亂，二十年，——一七五五年——朝廷乘機發兵兩路攻滅之，置伊犁將軍，烏魯木齊都統，塔爾巴哈臺參贊大臣以統其地，於是現在天山北路及阿爾泰區域入於中國。（註十三）二十二年，天山南路回教徒首領博羅尼都，霍集占作亂，朝廷發大兵攻滅之，置喀什噶爾——今疏勒縣——參贊大臣以統其衆，於是天山南路亦入於中國（註十四）太平天國之亂，中國內地騷然，回民乘機作亂，陷陝西甘肅境內要地及新疆全省，朝廷以左宗棠爲陝甘總督，率師恢復之。（註十五）德宗光緒十年，——一八八四年——置新疆巡撫，駐烏魯木齊，統轄全省，裁撤烏魯木齊都統，縮小伊犁將軍行政權

，於是新疆全省悉改爲郡縣制度。（註十六）其民族約分爲六種：

一，纏回 漢代城郭諸國之後，散居新疆全省，而天山南路尤多；男子不蓄辮髮，以白布纏首，故俗名之曰纏頭。蓄鬚甚早，衣僅過膝，婦人辮髮着長裙，男女皆着皮鞋，奉回教。

二，甘回 爲纏回之同化者，多數住天山北路，男女服裝畧似內地，但男不辮髮，女不纏足；語言亦同漢人，奉回教。

三，布魯特 爲漢代休循，捐毒諸國苗裔，散居新疆西南部，奉回教，風俗畧同纏回。

四，哈薩克 漢代康居人種，居新疆西北部，奉回教，語言服裝近於纏回，而以游牧爲業則似蒙古人。

五，蒙古 分額魯特，土爾扈特，和碩特等族，散居新疆東北部，信喇嘛教，以游牧爲業。

六，漢人 內地移居者，各省人皆有，官界以湖南湖北人爲多，商界以天津人

爲多，尤以天津之楊柳青鎮人爲多，農界則陝甘人爲多，其他若山西人則經商，四川人大致爲農與商，三江人則爲官，統計約占新疆全省人數之半；雖皆名爲奉佛教，實則兩湖四川人多在哥老會，天津人多在理門。（註十七）

註一、清鑑易知錄正編一第七頁第八頁

註二、清鑑易知錄正編一第十四頁

註三、皇朝掌故彙編內編卷三十五第三頁

註四、同 卷三十八第一頁

註五、同 第六頁

註六、東方雜誌第二十二卷第二十一號第三十頁至四十三頁徐恒燿滿蒙的勞動狀況與移民

註七、地學雜誌民國四年第七八合期第十六頁張相文塞北紀行

註八、地學雜誌第七年第八期第十二頁林傳甲察哈爾鄉土誌

註九、地學雜誌民國二年第二期第四頁吳祿貞東西盟蒙古實記

註十、地學雜誌民國四年第七八合期第十六頁塞北紀行

註十一、聖武記卷三國朝綏附蒙古記三

註十二、聖武記卷三雍正兩征厄魯特記

註十三、聖武記卷四乾隆蕩平準部記

註十四、聖武記卷四乾隆蕩平回疆記

註十五、清史紀事本末卷五十七

註十六、清史紀事本末卷五十六

註十七、地學雜誌第八年第一期第十八，十九頁賈樹模新疆雜記



第八章  
証

## 結論

綜合以上所述，約得斷定如左：

一，中國人民爲漢滿蒙回藏苗六族混合體，不必互相排斥。

二，漢族主體由三支以上混合而成，一爲黃河下流淮水北岸之農業民族，——神農以前——二爲由張家口北移入之遊牧民族，——黃帝——三爲渭水流域之農業民族——周秦——

三，滿族之根據地東三省，唐虞三代之肅慎，漢之扶餘，東漢三國兩晉南北朝隋唐時代之高麗，百濟，唐之渤海，宋之女真，明之滿洲，皆其族所建立之國。由唐虞至隋末，常與漢族交通，高麗百濟衰亡，與漢族爲第一次小混合，渤海衰亡，爲第二次小混合；金室衰亡，爲第一次大混合，清室衰亡，爲第二次大混合。

四，蒙族之根據地在外蒙古，三代之葷粥，獯鬻，玁狁，秦漢時代之匈奴，兩晉時代之前趙劉氏，後趙石氏，夏赫連氏，北涼沮渠氏，宋之蒙古，元之帝室

與欽察，察合台，窩闊臺，伊兒汗四大汗國，明之韃靼，瓦剌，現代內外蒙古與青海諸部，皆其族所創立。五胡之亂平，與漢族爲第一次大混合，元室衰亡，爲第二次大混合。

五，滿蒙混血族之根據地在熱河，秦時之東胡，漢時之烏桓，鮮卑，三國晉初之遼東慕容氏，遼西段氏，右北平塞外之宇文氏，雁門塞外之拓跋氏，兩晉南北朝時代之前燕，後燕，西燕，南燕，西秦，南涼，後魏，北周，北齊，吐谷渾，柔然，隋唐時代之奚，契丹，宋之遼與西遼，皆其族創立之國。烏桓衰亡，與漢族爲第一次小混合，前燕後燕西燕南燕西秦南涼後魏北周北齊衰亡，爲第一次大混合，吐谷渾衰亡爲第二次小混合，遼室衰亡，爲第二次大混合。

六，回族之根據地在阿爾泰山系，秦漢時代之丁零，月氏，烏孫，南北朝時代之高車，鐵勒，隋唐時代之突厥，回紇，薛延陀，沙陀，後五代時代之後唐，後晉，後漢，皆其族所創立。突厥衰亡，與漢族爲第一次混合，沙陀歸化，爲第二次混合，回紇衰亡，爲第三次混合。

七，藏族之根據地在青海西藏，秦漢時代之氐羌，兩晉時代之前秦苻氏，後秦姚氏，後涼呂氏，仇池楊氏，唐之吐蕃，黨項，宋之西夏，元之緬國，清之大小金川，皆此族所創立。五胡之亂告終，與漢族爲第一次混合，黨項歸化，爲第二次混合，吐蕃衰亡，爲第三次混合。

八，苗族之根據地在揚子江中流與西江流域，唐虞時代之三苗，周之荊蠻，漢之西南夷，晉之成李氏，唐之南詔，後五代時代之天興，義寧，皆此族創立之國。春秋戰國時代，楚吳越相繼勃興，併吞揚子江流域，建立大國，爲漢族與苗族第一次混合。秦始皇統一六國，命王翦定江南，降百越，置會稽郡；廢閩越王，置閩中郡；畧取南越陸梁地，置南海，桂林，象郡；爲第二次混合。漢武帝時，滅南越，閩越，東甌，招降西南夷，徧置郡縣，爲第三次混合。元滅大理，爲第四次混合，明取雲南，貴州，爲第五次混合，清初改土歸流，爲第六次混合。

九，春秋時代之南蠻爲苗族，西戎爲藏族，北狄爲滿蒙混血族，只有東夷爲何族，後世無其血統，不能指名；然其族性情剛猛果敢，富於有爲氣象，其根據

地在淮水流域與山東半島，自此族血統與漢族混合，而淮南淮北與山東好生偉人，中國歷史上受其影響，發生極大變化。

十，漢族對於東南方，常居主動地位，常取進取政策，常用壓迫手段，其結果則中國東南方面苗族分布地全成漢族領土，土人全被漢化。漢族對於西北方，常居被動地位，常取保守政策，常用防禦手段，其結果則中國西北方面漢族領土，化為滿蒙回藏族雜居地，新來之客民亦自然漢化。

十一，漢族為農業國家，以文化勝，西北之滿蒙回藏為遊牧民族，以武力勝，滿蒙回藏族以武力壓倒漢族者，漢族以文化吸收之，融合之，故每一競爭，漢族勢力一膨脹；無論主動或被動，無論戰勝或戰敗，其結果同也。

十二，漢族以文化勝，西北民族以武力勝，自周秦以後，南北相持者千有餘年，西北民族雖時常侵入中國內地，然卒不能永久占領，且亦未嘗畧有全部；故中國文化，雖曾被遊牧民族所蹂躪，猶能維持一部分於不墜，稍有機會，仍恢復其本來面目，繼長增高；自春秋以後，至有唐中葉，為漢族優勝時代，文化固時

常進步也。自北宋弱於遼，滅於金，南宋弱於金，滅於元，於是南方開化民族，遂爲北方游牧民族所壓倒，國民道德逐漸退化，遂開異日西力東漸之先路；是爲歐人壓服中國之遠因，滿蒙二族之同胞實尸其咎也。

十三，中國北方民族以武力勝，愈偏於北方者，其武力愈強。遼滅於金，因遼之根據地在熱河，稍偏於南；金之根據地在吉林，則偏於北也。金滅於元，因金之根據地移至現在北京，太偏於南；元之根據地在外蒙東部，則偏於北也。此外若匈奴石氏滅於鮮卑慕容氏，慕容氏復滅於拓拔氏，沙陀石氏滅於契丹耶律氏，皆可以此例推也。

十四，北方游牧民族，以武力征服漢族，占領中國內地，建立大帝國時，例被漢族同化；及被同化以後，則武力驟衰，繼起之北方游牧民族復取而代之。若遼之滅於金，金之滅於元，皆此例也；若後趙之滅於前燕，後燕之滅於後魏，亦不外此例也。

十五，滿蒙二族同爲北方游牧民族，然滿洲地方距海近，河流多，交通便利

，其民族開化較易；若扶餘，若高句麗，若百濟，若渤海，若金，若清，皆與漢族同化，建立大國，具有文明氣概者也；故可臆斷之曰滿族之被同化力較強。蒙古地方離海遠，沙漠多，交通不便，其民族開化較難；若匈奴，若蒙古，若韃靼，若瓦剌，若今之外蒙古諸部，與漢族接觸甚久，依然保守其割腥咽羶舊俗，不肯同化於漢族。即元主中國，將及百年，亦未嘗完全同化於漢族；故不旋踵爲漢族所逐，遁還漠北，恢復其洪荒草昧狀態，不若有清之扶植滿洲勢力於中國，將及三百年也；故可臆斷之曰蒙族之被同化力較弱。然元雖亡，其遺族猶保持其特性，至今不滅；有清未亡以前，滿族之特性已消磨殆盡，則二族之優劣，又未可以進化不進化分也。遼爲東胡遺民，實滿蒙混血族，其根據地距中國密邇，交通頻繁，其易於被同化之程度與女真滿洲人等；前乎遼者，若前燕，後燕，西燕，南燕，西秦，南涼，元魏，北周，北齊等國，皆曾畧有中國領土，建立具體之文明國，在世界史及東洋史上觀之，固可承認爲進化之民族；然鮮卑契丹遺民已全數同化於漢族，現在世界各國中，此民族之名義已不復存在，畢竟爲優爲劣，又

我輩論史者所難斷言者矣！

十六，北方民族之特性，剛悍猛鷲，而缺乏持久性與忍耐力，故有大英雄統率之，易於成功，無大英雄駕馭之，亦易於失敗；其成功也，蓬蓬勃勃，如火燎於原，不崇朝而影響達於四圍環境；其失敗也，如雪解，雲散，煙消，霧斂，世界上幾無此民族遺蹟之存在焉；其特性使然也。英主如匈奴冒頓單于，鮮卑檀石槐，後魏道武帝，突厥土門可汗，後唐莊宗，金太祖，元太祖，清太祖，太宗等，其慍悍捷疾，遠在秦皇漢武以上，而規模之濶大，步調之整肅不及焉，故其成績有時反在秦漢以下也。亡國之君如金哀宗，其慷慨激烈，勇於赴義，亦遠在周赧，漢獻，晉懷愍，宋徽欽以上；國君死社稷，死得其所，是謂考終，不肯俯仰睨睨，低首下心，身爲降虜，伺候敵國主人之顏色也。暴君如前趙劉聰，後趙石虎，夏赫連勃勃，北齊文宣帝，北周天元帝，金海陵王亮等，其殘忍淫虐，亦遠在夏桀，殷紂，宋前廢帝子業，後廢帝昱，齊東昏侯寶卷以上；縱慾敗度，走於極端，足以表示人類社會先天上之獸性，足以代表文明人之野蠻性，不似南方



各國君主，身爲惡事，故隱其名，藏頭露腳，欲蓋彌彰，妝模作樣，醜態百出也。

十七，中國爲東方大國，境內爲一大平原，人民眼光闊大，不褊淺，不妒嫉。其所產生漢族之風俗習慣，結婚自由，信教自由，殖產興業自由，對於一切異民族富於同情心，法律上，政治上，經濟上，教育上，一切平等，無差別待遇；故西北民族自動的或被動的移入中國，經過一世至數世，百年或數十年後，輒被同化於漢族。漢族與西北民族接觸，無論文化的或武力的，無論戰勝或戰敗，總能吸收異族骨血，化爲漢族系統；蓋親親而仁民，仁民而愛物，修身，齊家以治其國，而最終之目的在平天下，無國界，無種界，四海之內皆兄弟，一切民族皆平等，儒教之感人者深矣。歐洲境內多小平原，分離破碎，化爲若干小國，中間多以天然之山脉，河流間隔之；故其人民眼光狹，度量小，富於競爭心及排外心，而缺乏同情心。對於異民族或異教徒，排斥摺擊不遺餘力，法律上，政治上，經濟上，教育上，一切不與以平等待遇，剝奪其種種自由權。故匈加利移入歐洲

後，經過一千五六百年，卒不肯與歐人混合；與奧國合併以後，經過幾五百年，而卒與奧人分離。土耳其建國歐洲已歷五百餘年，歐人始終欲驅之於歐洲以外，土人亦決不肯同化於歐人之中；經過歐洲大戰，雙方益分道而馳，卒無融合之希望。芬人移入歐洲已歷千有餘年，卒不與歐人混合，與俄合併以後，經過逾二百年，而卒與俄人分離。非黃色人種故遠歐人，實歐人之排外心理及其手段迫之使然也。是故中國而不欲自強也則已，中國而苟欲自強也，則北匈奴苗裔之匈加利人，西突厥遺族之土耳其人，鮮卑遺族之西伯利亞土人，皆我親同胞，固可招之即來；黃色人種之芬人亦我嫡堂弟兄，未嘗不可邀之使至；彼輩固日夜禱祝我國速強，爲之向歐人一吐氣也。

十八，中國舞臺脚色，以漢族爲正生，正旦，滿蒙回藏族爲淨與副淨，正生正旦以唱工及做工見長，——文化——淨與副淨以架子及武工見長，——武力——各有特色，彼此不相掩也。自北方民族侵入中國，漢族受種種蹂躪，文化驟然退步；北方民族移入南方，安富尊榮若干年，受環境影響，武力亦逐漸退步。南北民族同

時退化，中國舞臺脚色，不能支撐自己本舞台門面，於是他洲脚色，即思奪取其後台老板資格，起而代謀；盎格魯撒遜之英人取印度爲根據地，東據緬甸，海峽殖民地及香港，西窺雲南，西藏，北向爭霸於中原，代表正生，正旦；斯拉夫族之俄人據西伯利亞爲根據地，東窺東三省及朝鮮，西覷天山南北路，南向爭霸於中原，代表淨與副淨；英人不能禦，乃利用東方勃興青年國之日本爲傀儡，與俄人相拼。日俄戰役以後，東方形勢稍緩和，而西方勃興青年國之德意志，又利用武力，富力爲後盾，以外交手段，聯絡奧國，土國及布國，創修漢——Hamburg——報——Bagdad——鐵路，橫斷西亞，東歐，將出波斯灣，以與英國之蘇彝士運河競爭，截斷英印之交通路，制印度總督府之死命；英人不得已，乃運用其祖傳之狡猾外交手段，慫恿法人出頭與德宣戰，而英人爲其後盾，是爲歐洲大戰之張本。此一幕武劇，英爲後台老板，法爲前台老板，美爲最後加入之大股東；武劇閉幕以後，法國受損失最重，美國出勞力最多，而英國則得利益最鉅，彼持籌握算操奇計贏目光敏銳手段老辣之島國男兒，對於其同種同族之國家，猶惟利是視，不

知正義人道爲何物，更何論對於異種人，更何怪其對異種人也。

民國十七年二月二十四日脫稿

結論

結論

二四二

# 史地叢書

## 再版中國歷代黨爭史

王桐齡著 定價八角 郵費三分

政爭之劇烈，黨禍之頻繁，爲中國歷史上特色；由漢至清二千餘年，歷代末路，往往發生此種現象，爲中國內亂原因之一；而蒼萃成書，以供國人之殷鑒，尙無善本，讀者憾焉。本編爲王氏歷史叢書之一，對於歷代黨禍之原委因果，一一條分縷析，纖細靡遺；間或加以批評，亦能就事論事，公平判斷不參加個人意見；誠千秋之金鑑，凡關心國事者，不可不人手一編也。原書久已風行海內，現由本社同人敦促，從新訂正增補，全書十萬餘言，現已出書。

初中師範教本	世界史	殷祖英	一冊八角
初中師範適用	本國地理	程國璋	二冊上七角 下七角
初中師範適用	世界地理	殷祖英	二冊上八角 下六角
中國近百年史綱要		高博彥	二冊上一元 下一元
最新中國近世史		陸光宇	一冊九角
初中世界地理		呂士熊	一冊八角
西洋大歷史		李泰棻	一冊四元八角
民國地文總論		白眉初	一冊四元
中華地理分誌		王金紱	二冊二元
記錄以前之人類史略		李泰棻	五冊十七元九角
蒙古與中國		高博彥	一冊六角
太平問題與中國		程國璋	一冊一元二角
初中中國地理		楊蕙田	一冊八角

文化學出版社

## 史 地 叢 書

### ◎民國史要

陸光宇著

洋裝一冊大洋五角郵費二分半

內容起自民國初創至最近(十六年四月)，記事明簡，議論平允，留心時局者，宜各手此一編也。

### ◎西史綱要

張仲和著

洋裝二冊上卷大洋一元下卷一元五角

本書純用提綱挈領之法，取西史之精華，依次論列，原因事實結果均朗若列眉，人名地名之下，且列有原文，便於檢查，記憶，能使學習是科者一目了然，收事半功倍之效，取材至西歷一九二六年八月止，於法德問題賠償問題戰債相互之關係，解決之情形，如(保安公約與道斯計畫)與對俄問題之前途，棒喝主議之概況，均有簡明之敘述，閱者對於近十年來歐洲複雜糾紛之局面，自能瞭然於心，無待他求矣

### ◎中國史鳥瞰

常乃惠著

洋裝二冊大洋五角郵費二分半

此書共分五編，第一編講中華民族之構成及發展，第二編以下講法制經濟，日常生活，學術思想之進化，合之則成一書，分之則各成系統，文字明顯，易於閱讀，凡有志研究中國史者，手此二冊誠入門之階梯也。

### ◎地學通論

劉玉峰著

是書分上下兩卷上卷分數理陸界海洋氣候生物等編下卷分人類經濟政治等編內容取材宏博解釋詳明就自然現象及人生狀況根據新事實說明其因果關係對於常識尤特別注意欲了解吾人地理環境及人地互相之關係者不可不讀也第一編數理之部先出以下繼續出版。

王氏遊江浙旅行記

王桐齡著 定價五角

本書對於江浙之社會狀況，教育狀況，交通狀況，以及南京，杭州，嘉興，蘇州，無錫，鎮江，揚州等處之古蹟名勝物產土宜，一一詳加記載，纖細靡遺；附載各處地圖，可供參考，各處竹枝詞或風景詩，可增興趣，誠臥遊東南之祕笈，有志研究歷史，地理，政治，社會學者，不可不人手一編也。

王氏遊  
記之五 陝西旅行記 王桐齡著 定價五角

本書對於陝西社會狀況，交通狀況，以及長安，咸陽，終南山，華山等處之古蹟名勝物產土宜，一一詳加記載；篇中附載終南山華山二植物表，可以供博物及林業上之參考；篇末附載陝西在中國史上之位置一論文，可以供史學及軍事學上之參考；誠臥遊秦中之祕笈，有志研究歷史，地理，政治，軍事，社會，林業學者不可不人手一編也。

王氏遊日本視察記 王桐齡著 定價

本編爲王氏遊記之一，原名東遊雜感，久已流傳；茲復從新訂証增補，第一章加入十一條，第四章加入日本之地理，民族，民族之能性及建國年代四節，編末附載日本東北旅行記一篇，對於日本之歷史，地理，政治，社會狀況，一一詳加記載；中附載東京西京地圖，可供參考，各處竹枝詞及風景詩，可增趣味，誠臥遊東瀛之祕笈也。

◎中華民國史 孫嘉會著 每冊七角

本書起自辛亥革命，終於最近張作霖大元帥時代，對於屢次政變，戰爭，外交，記載詳實，無一遺漏。全書七萬餘言，後附民國要人姓氏表，中央地方官吏沿革系統表，尤便檢閱。誠爲研究歷史及留心時局者，所不可少之書。現方出版購請從速。



大 學 高 中 適 用

# 中國史

本書係王桐齡先生精心結撰之作，關於歷代文化，政治，軍事，商業，外交，以及文學之變遷等，言之特詳，每章有序論，有提綱，有註釋，有引證之參考書，最便於學者之研究，其眉目之清醒，及材料之豐富，爲史學書中所罕見，第一二編均已再版，註釋添加，又加表解二百餘則，讀之更爲醒目。

中華民國十七年六月出版

## 中國民族史

定價大洋七角

外埠另加郵費

著 者

任邱王桐齡

發 行 者

文化學社

印 刷 者

文化學社

總發行所

北京興華門前  
文化學社  
電話南四五八零

北京博益書社

正定中華書局

南京南京書店

北京景山書社

太原晉新書社

廈門新民書社

北京佩文齋

奉天李湛章書局

雲南益友書社

天津直隸華英書局

長春中華書局

重慶重慶書店

開封豫柳文書莊

上海泰東書局

成都新學社

綏遠明善堂

蘇州振新書社

廣州中山大學

▲版權所有

翻印必究▼



